

淮海英靈集
三









淮海英靈集

三

阮元輯



中華書局



淮海英靈集

王

字慈峨。江都貢生。有自贈詩云。壯心欲試常調馬。習氣難忘是著書。檀秋谷稱其詩穿穴唐賢。不趨時尙。雍正癸卯卒。年七十六。著懷孟堂詩一卷。

輓閻徵君百詩若璣

遠寄雙魚憶夏初。知君善病正愁予。傷心適易曾參贊。感夢先呼范式車。余於先生屬櫛之夕。徵之夢兆。老去難忘知己。人間誰續未成書。著有尙書古文疏證。樓頭若問山陽笛。絕調於今寄太虛。

許承家

字師六。號來庵。江都人。給諫承宣弟。康熙乙丑進士。官翰林院編修。方領資選坊局。以兄老里居乞歸。著輓徵閣詩集一卷。

書梁正公齋壁

昔正公偕余北行。歸自淮上。會車而舟。過長湖。暴風作。舟人驚甚。余強爲正公書古格言數百字。以廣其意。今過其所居。適復見之。感而有作。

馳驅二千里。齊魯隨車轍。岳勢接平疇。蒼茫山石裂。歷歷古賢豪。顧盼驚魂魄。牛馬襍征鏢。弔古氣空結。淮水湯湯流。忽復理舟楫。片颿疾若駛。巨壘驚沙磧。據櫓下長湖。魚龍歛出沒。左顧波洶涌。右顧壁突兀。乃信遠行人。歸路休倉卒。定力達天人。狂歌敵崩潰。申紙強揮豪。豈畏蓬窗窄。摩挲壁上書。寒風猶凜冽。懷家惕巷老人。

慈仁松下老儒生。相對掀髯淡世情。跋燭傳杯人一斗。聞鐘校字月三更。自從漢洞催歸客。遂使燕臺速去旌。昔日連牀今異路。可能秋露共蕪城。

郊居述懷

性僻甘彫謝。狂吟近水鷗。餐花眠石上。洗研坐磯頭。梅礙重檐雪。梧荒古寺秋。試看漁釣穩。身世莫他求。

許錫齡

字鶴坪。江都人。

臨臯亭

何處臨臯亭。江干對杳冥。遠山沈霧白。小艇放烟青。芳艸邱遲宅。蘋花柳惺汀。遷居應有句。鴻雪幾年經。

許昌齡

字眉石。江都人。編修承家子。著碧摩亭集一卷。

懷楊安城先生

萬里重關見而難。考槃何處碩人寬。望中沙磧天無際。思入松陵水亦寒。雲影當空易零落。烽煙幾度報平安。玉瑤杯泛何年事。閒倚西風翦燭殘。

許迎年

字毅士。一字荔生。江都人。鄉飲賓承宗子。給事中承宣姪。康熙丙子舉人。庚辰進士。官中書舍人。魏周琬稱其詩于曹劉陶謝林韓溫李無不學。而融液于己之性情。今玩其詩。長于側豔。故香奩諸作最工。所著有

槐墅詩鈔四卷。妻徐淑則。清獻公季女。著綠淨軒詩。工麗絕世。荔生閨中倡和之作尤多。

齋居春雨次淑則韻

辟窰園林細雨昏。書長人靜掩重門。文犀低押風聲軟。寶鴨微熏篆影溫。醉竹似垂湘女淚。殘花難覓杜鵑魂。幽齋消受閑中況。好檢芸編共討論。

送春

過眼風光綠已芟。怕看眠柳剩鈎鈎。愁深盡付紅螺醖。寒退初尋白蛤衫。蜀魄有情思望帝。花魂無著倩巫咸。魯戈不挽虞淵馭。來歲重逢恨已緘。

月夕漫興和淑則韻

皓月耿良夜。花陰露濺衣。護雛閒燕語。繞樹見鴉飛。下箸莼絲滑。堆盤豆莢肥。一樽欣共把。寂寞掩荆扉。

和淑則園居病起作

一病經春意索然。幾時不到小亭邊。花殘幽砌堆紅雪。鶯轉垂楊破綠煙。輕暖未成連日雨。薄寒猶怯晚春天。方池新漲游魚樂。興寄濠梁秋水篇。

春閨詞

漫啓菱花七寶奩。春愁橫壓兩眉尖。庭前一任桃花放。繡閣春寒不卷簾。水沈香燼冷薰籠。寂寞黃昏閉綺櫳。羅幌照殘清夜月。湘簾吹透落花風。心事淒涼靜掩門。梨花滿地鎮銷魂。畫欄倦倚憐春色。親把金釵記月痕。

春閨詞和韓偓香奩集韻

想從恨處歡還在。思到歡時恨已亡。春掩重門人寂寂。落花和雨下池塘。

望中新綠暗谿橋。香徑行來草沒腰。燕子不歸春已老。柳絲牽恨一條條。

夏夜偕淑則小酌

雨歇涼生見夕曛。晚鐘風送隔牆聞。檐前滴翠皆因竹。江外奇峯總是雲。螢點疎簾爭燭燄。花殘小徑縷苔紋。閨中德曜吾良友。小酌湘吳細論文。

贈孫惟臣隱君

徵君家住古雷塘。杖履優游樂未央。繡帛久辭公府辟。烟波閒占鷺鷥鄉。歡呼野老雞豚社。服食仙人玉石方。最是佳兒才絕妙。官梅句好似何郎。

晚晴有憶綠淨軒

山色鬱崔嵬。天晴宿霧開。鴉隨雲影沒。波盪月華來。泥酒將愁敵。尋書作睡媒。蓮花開曲沼。留待主人回。

許

字損齋。儀徵人。詩學韋白溫李諸家。晚年手訂二謙百八十首。子珩。字楚生。錄爲破硯齋詩鈔一卷。

古意二首

酌君琥珀杯。贈君珊瑚鞭。送君出門去。君意頗留連。一去經三載。妾心思繇繇。昨聞鄰人語。君久致富貴。鄰人爲我怒。我反爲君諱。君之富貴妾之願。君終棄妾妾不怨。

出門所見誠可恥。腰閒寶劍迸秋水。幾回欲拔行復止。此兒醜醜何足死。斯劍一污安可洗。

人定

人定羣動息。夜久如涼秋。皎月失河漢。天風吹女牛。草光連露白。螢火入檐流。今夕是何夕。茫茫生我愁。

高

巖字山公。如皋人。由軍功授戶部江西清吏司郎中。前知廣東永安河南孟津縣事。工部虞衡司。軍功加十九級。正一品服。

荅兄

憶自束髮始。嚴親授句讀。勉我作良臣。期我以名宿。乙卯耿孽動。行閒蒙甲冑。相從西域征。戮力殄渠寇。天軍若貔虎。犬羊安敢鬪。疾風捲殘雲。小醜咸授首。微勳邀隆眷。叨職佩墨綬。君恩優渥深。天地比高厚。一身許報國。自生效奔奏。所嗟子職。就養違左右。忠孝雖難全。內省寧無疚。蒼蒼疊遠山。鬱鬱多危岫。白雲望吾鄉。天遠不能就。昨兄尺素來。醇意如飲酎。道親屬望深。責子以不朽。自顧功烈卑。敢復期垂後。惟此赤心腸。持以報我后。春風野草新。春意梅花舊。寄語兩兄弟。爲我酌言壽。國恩不敢忘。親心不敢負。高堂暮年時。心宜空諸有。無爲遠遊子。結結復糾糾。

高

溥字亦水。如皋人。由貢生任潛山安東教諭。陞山西沁源縣知縣。安徽鳳陽府同知。

客行二絕

悠悠策駑馬。遙遙下山坂。颯颯吹禾黍。古道秋風晚。客行雖云樂。不如守南畝。兄弟兩三人。雞黍一樽酒。

高

清字澣，如阜人。由軍功授北直內黃縣知縣。調湖廣衡陽縣知縣。三攝衡州府篆。又攝衡永郴道。又十攝常寧衡山等縣篆。

蒼內黃父老

余初令內黃。十年丁先大人憂。服闋。起吏陽令。途次黃。黃民數萬人迎於途。而歌之曰。南風吹雲雲飛揚。公車出城聲琅琅。鸞鈴絡馬青絲韁。上西河外爭趨躋。紛紛藉藉迎道旁。老幼喘息歸止。

蒼。內黃之令惟公良。撫綏十載恩義長。視民猶子真如傷。不欺縣寮志強梁。片言折獄無隙障。鮮有餘積充案。囊。公一去心激昂。思之不得真徬徨。邈天之幸來吾疆。屏摩趾錯競相望。士女紛紛羅酒漿。赤門遠勝相持。鶴。自公遠去湖衡陽。衡之民慶我心戕。留公無策心忙忙。舉杯酌酒祈穹蒼。願公名位重輝光。願公非祿。爵而康。車如流水馬勝驪。懷君子兮天一方。公德巍巍不可量。衡山高兮湖水長。予亦就馬上攬涕咨之。

君不見隆慮縣令喬智明。當時父老稱神君。又不見長葛房公爲慈父。碑傳德政留千古。古人治化樂愷愷。致令身去風流在。我昔銜命出神都。墨綬銅章來作宰。涓埃未有蒼蒼生。共樂皇恩深似海。今將舍爾向衡陽。父老泣涕滿道旁。香烟蔽空如塵霧。何以贈之心鬱憤。願爾讀書時不失。願爾耕斂莫相妨。出入息好生涯。無事不可到公堂。衡山高。高雁峯在。時修音書寄一行。

高

謨字禹傳。號雨船。如阜人。

山行

舍棹復山行。崎嶇更幾程。兩邊杉木影。一路畫眉聲。臘似中春後。人忘倦旅情。欲求投宿處。遙指鬱烟橫。

顧圖

字書宣。號花翁。江都人。康熙甲戌以第三人及第。官翰林院編修。少負異稟。性醇樸。嗜古食書。寒暑無間。圖河開。家在城東七十里外。偶入城。必載書滿車。古文論排體。皆根柢古人。尤上於詩。每與名流詩酒相酬。詞辯鋒起。同里史蕉飲太史。稱其詩云。具陵跨百代之力。而不傍一門戶。蓋盡得古人之師承。而自立於宗派。後者。元案。花翁早年。詩特妍秀。頗爲時稱。機乃焚棄。自甲子至丁卯。得詩三百餘首。同里汪蛟門比部。更爲

刪訂。稱之云。恢奇典衍。盤礴不羈。故二公論詩。雅趣極合。蛟門卒後。花翁用張籍祭昌黎體。作詩祭之。汪鈍翁嘗見公詩序云。蛟門之視書宣。其殆如韓昌黎之於孟東野。歐陽永叔之于梅聖俞歟。所著有雄雉集六卷。

其齋又名華
蟲別館

銘座十章錄六

樹當鏗惡木。草當薶邪蒿。邪蒿生無根。惡木日夜高。牙蘖苟勿翦。斧柯將重勞。拔根絕其蔓。寸地勤鋤薶。擷學而種仁。情蘊非賢豪。祛妄。

西日難爲繩。東波難爲窮。虛生與浪死。志士懼不免。鼎鼎百年內。一瞬不及轉。誓言敦素業。渴心慕先典。孤生幸有聞。雖晚豈辭勉。惜陰。

保國釋外懼。攝生留小疾。朽索馭羸馬。徐行百無失。中疎固其衛。獲少靳其出。割慾如守疆。謹身如縛律。不讀黃老書。淵冰宜戰栗。攝生。

善走須得途。斜徑不可行。善博須得虛。不關人力成。達人期任運。世路誇趨營。百慮輸一妄。百巧轉一誠。不見信天翁。亦得全其生。任運。

君子如春風。可愛不可竭。小人如酒顏。但得暫時熱。急絃莫浪彈。一彈絃一絕。市交莫浪交。中路難團結。惟常同心人。可與論金鐵。息交。

百觚聖無量。三爵禮有考。誰云飲狂藥。而可通大道。墜車幸無傷。不如安坐好。飲酒但飲和。玉山推不倒。莫造無功鄉。是中非可老。止酒。

汪蛟門比部招集十二祝齋次宗丈梅岑韻

中春日在奎。既望月離畢。溼雲苦如翳。陰魄那照膝。困欲酒爲年。悶對詩過日。轉覺增頭風。坐憂主腹疾。忽此枉折簡。霍然起投筆。況聞二仲聚。何惜雙屐出。曲引穿修廊。規方徑斗室。吻燥嘗喬酒。手香破盧橘。天愁稍開霽。人歡失寒栗。銀絲鮮鮑美。碧縷嘉蔬苗。數行爵無算。一取醉爲率。酒糾嚴有政。詩筆峻如律。偉觀驚愚蒙。淺衷味深沕。炎炎五字城。蕩蕩萬里漆。公誠竊壇坫。誰敢鬪篇帙。門生妙春華。謂阮生老友茂林實。謂宗丈連枝更挺拔。二華竝峯嶺。謂叔定諸君互唱酬。賤子但傳述。神驥不易追。跛牂恐非匹。將詩乞砭鍼。如病待蒼朮。束帶辱昌黎。探囊愧長吉。幸因禮數寬。頗叨往還密。宿醒苦未消。醉語恕野逸。

附汪詩：幽禽耽高翔。觸機還羅畢。野鶴落近玩。沾泥沒蹀躞。所以塵外人。樂此山中日。愛酒思無功。狂吟念藥疾。遊突飭醺姿。偉哉濟蕩筆。如何數百載。此輩不一出。新雨才及階。吾子儼入室。咄嗟令蕭颯。荒怪欲剖割。譚者神彩張。聽者毛髮栗。軍聲正嘖嘖。章句鄙軋軋。嘉賓自謹慎。賤子婉草率。差堪作酒頌。未敢犯詩律。妄語空飛揚。精理本溶沕。澄懷觀惠涉。高文契莊漆。年來學捐書。近且志焚帙。有客枉尺素。勸我數華實。何殊立培塿。而乃仰岑崔。不令甘浮沈。下列墓刪述。庶幾陶謝駭。敢冀聖賢匹。眷翊一畦韭。秋釀十畝秫。約已聊遺災。實辭或爲吉。景光相留連。鍾磴任稠密。署街稱老狂。招隱者遺逸。

再疊前韻呈蛟門

狡兔不投置。騶虞反望畢。許國悲乃心。還家審容膝。易課柔剛辰。書分雙隻日。文成半解嘲。客過常稱疾。奈何經國手。更弄經生筆。吾道在有守。斯人豈虛出。精銳錐處囊。光芒劍離室。孤類常門闥。真非過淮橘。側足機穽危。回頭心膽慄。樹凍亦已花。草枯亦已苗。大運有轉移。達觀恒坦率。詞場建旗鼓。韻語協鐘律。

鑿險開洪濛。蘊真舍穆洳。信矣唾成珠。矧猶髮如漆。矧常列旂常。匪惟光卷帙。譬彼梅有花。終爲鼎中寶。文章苟彪炳。功德竝翠翟。逢時幹造化。希聖續作述。漫云月露姿。僅與齊梁匹。學圃常蕝芝。飲醇常餌朮。守雌即可師。居謙動成吉。金相粹而堅。玉德縝以密。螻屈毋嗟吁。龍驤會超逸。

弈旨

讀班固弈旨。廣而韻之。得二百字。仍以命篇。

楸枰地分井。玉子天布宿。會戲敞閒軒。脰膊敲清晝。覲面藏險艱。擬坐遑格鬪。眈眈目未瞬。兀兀手頻袖。當敵轉神迷。旁觀欲色授。爭死育饒先。鼓行防蹶後。多貪輒厚亡。小棄恒大就。陷圍賈拳勇。奪角伺罅漏。手籌權死生。株坐駭枯瘦。湘東一目敗。南塘屢劫覆。珠探驪領深。子得虎穴驛。偏師務旁擊。近攻先遠逗。設伏誘驕騎。開壁縱窮寇。垂成忽中變。一失或不救。墜鹿幻有無。塞馬難諦究。諱敗仇豈平。狙捷怨益構。得著衆皆驚。悔誤誰請又。緡圖悟機格。覆局正紕繆。苦戰忘飢疲。熟視反眩眚。虧成一偶然。收奩倒醇酎。

村巫賽神曲

椎神鉦。搗神鼓。鉦助妖譟。鼓助舞。披髮銜刀神降語。須晴卽晴。雨卽雨。高原多黍下多稔。牛生兩犢。羝羊乳。雞鶩將雛。不可數。老翁跪領巫所傳。神之福。我將無然。大肉硬餅堆滿盤。渾醅魯酒澆如泉。但願年年作秋社。村巫醉死神壇下。

初夜過右周天寧寓舍

君來城北寺。興到偶相尋。樓被寒房客。香燈獨夜心。疎鐘僧罷課。初月殿斜陰。鎖鑰能遲下。何辭話漏深。
來詩有嚴城偏早閉。起別意何忙之句。

荒村

荒村仲冬月。晚日暴寒天。凍雀蹲簷密。風鳴鼓陣圓。老盆深注酒。短褐厚裝綿。何似幽燕道。霜華犯馬羣。
臘月十六夜。赴東鄰酒會。

缸面酒初熟。鄰翁邀暖寒。柴經冬更美。月過望仍圓。徂歲如弦急。深杯抵海寬。荒村無一事。莫惜罄餘歡。
次韻題汪叔定抱耒堂

機穽爲衣笠。常冠縑車秧。馬挂簷端。一方翠毯春苗短。萬顆明珠夕露寒。相印爲無口二頃。候封差抵竹千竿。農家富貴元應足。未信真能老不官。

立春

如此頭顱羞彩勝。更誰纖手送青絲。幾年毛褐但仍舊。今日菜根聊及時。淡白小梅爭雪意。嫩黃垂柳試風枝。眼前已見春光漏。且釀狸毫自詠詩。

汪北阜覺堂史蕉飲見過荒村看桃花淹留信宿宗丈梅岑亦至自東原同集者爲荆慈衛阮月樵湯石臣限用禡韻。

輪蹄錯奕衡門下。鄰媼村翁各驚詫。東家孺子彼非賢。長者何因枉高駕。呼奴掃地排窗扉。延客升堂爇衣謝。兩年剋約誠久要。百金信諾非虛詐。歐詩遠客千里至。信士百金諾。滿堆三韭代饕餮。雞燒四和充蘭麝。松明常燭夜燃檠。蘆灰壓酒春流醺。推鉤送盞勸不休。徵令飛籌興難罷。選徒排當各分曹。罰爵縱橫互乘罽。一山不倒誰能推。白波席捲初何怕。不嫌多酌次公狂。那有行觴灌夫罵。風吹酒戶香滿鄰。雨壯詩腸句驚夜。掃牀拂席聽未了。晴光曉色來何乍。借騎鞍馬遶村行。更挈幔亭隨地架。遠近緋桃爭入眼。歷亂頽霞儼相射。穿林連臂踏紅茵。隔溪搖艇呼黃帕。邀嬉真作武陵遊。譁呶竊恐秦人訝。晚樹啞啞栖已定。歸路猖狂行且叱。封家莫妬陶氏姝。明朝有興還乘暇。

二百四十本梅花歌爲喬石林侍讀賦

屋角梅龍大盈抱。爪尾騰擎向人倒。年來花眼被苔封。烏啄蟲芽半身橐。小株三尺如嬰兒。養護未成猶襁褓。人閒何處梅花國。空阻褰裳被花惱。安得幻爲倒挂子。兩翅翻翻撲晴昊。亂雪堆邊活一生。粉葉沾翎香貫腦。瀛洲仙客姑射姿。傾家買得羅浮島。千夫雷動連山移。開花如海粘天縞。魂翻眼倒迷西東。化作玉虹紛萬道。捲地風來香一城。落英飄散家家掃。先生拄杖入深叢。獨把幽情靜中討。無心洒掃待麻姑。哦詩要壓孤山老。此花骨性天下奇。雪打風欺渠自好。山礬水仙真妾媵。野杏溪桃只傭保。不嫌窮士攬詩材。那許庸工摹畫藁。峭帆欲訪苦不早。青子纍纍徒悔懊。仍常借騎果下馬。繞林百匝穿芳草。

六月望夜月下作

空天一色青無瑕。金盤擲出天之涯。纔高三丈忽破碎。亂竹巖蔽枝交加。碾空徐行無轍迹。杲杲正矚南窗紗。細蟲霧翳見翅股。蝙蝠飛掣如白鴉。斗牛注眼尙不辨。何況小星紛撒沙。千年老槐布怪影。滿地散走龍虬蛇。枝閒乾鵲夜不睡。兩翼脰膊聲查查。時平村市撤更鼓。麗譙若近當三摑。何人吹笛起前疑。疑有水仙浮小槎。活灰瓦盪蒸柏子。香氣撲鼻青烟斜。此時渴酒渴欲死。沆瀣點滴誰宵賒。急抽霜刀削碧玉。頰盤爛漫堆紅霞。齒牙冷冽甘且滑。冰液灌腦翻河車。倒身酣寢涼露下。魂飛直闕姮娥家。琉璃百頃洞毛髮。淩漢不駕空中槎。玉斧丁丁斫桂樹。落葉蹴踏香滿韉。綺裙素女四羅列。骨輕步窄容蓮花。顧我微微粲皎齒。不記童顏雙鬢丫。偷騎玉蚪弄雲霧。遊戲下捉金蝦蟇。胡然狡獪不返顧。仙骨雖在真形差。試聽霓裳洗塵濁。此曲莫向人閒誇。明朝拔筆諱不得。但戒俗子毋囂譁。

草堂對梅樹作

詩興復不淺。梅花何太遲。由來孤賞意。不在滿開時。香奪風霜出。春先草木知。極寒舒一瓣。何必向南枝。

投堯峯汪翰編用昌黎薦士韻

清都直巍班。玉局典真誥。幾時塵濁閒。敕遣騎雲到。至今殿前街。尙帶仙蓬號。盪胸浩淵海。萬派日疏導。手持雲漢章。口吐薰風操。混茫追正始。卓犖振衰耗。冥搜破郛廓。元覽洞幽奧。戛然九臯鳴。一洗衆禽噪。

殘膏及賸腹。或被羣兒盜。紛紛競騰踴。不足當躡躑。大鴉寢已微。勃與一何暴。臂彼十仞牆。誰敢窺窺窺。亦猶千里足。莫與競雄驚。道高日益孤。俗遠自殊好。或者味狷介。而謂多嫚寡。掬手挹東海。曾不加涸潦。側聞講席開。有叩無不報。天河灌百川。陽燧給萬竈。豈惟豁聞見。足可矻贖眊。渴心劇飛塵。蓄久不勝躁。誰言生苦晚。幸及公未耄。笈囊千里負。霜露兼程冒。下根至頑鄙。野性實惰傲。未能就招呼。況肯事請造。恭惟大賢姿。陶鑄等覆瓿。疾疚仰醫門。庸弗加矜悼。素絲近朱藍。緝采成織縞。侵晨執掃門。典謁會常告。投章冀束帶。加禮容著帽。幸不見擯拒。庶以慰戀嫖。學詩根柢疎。蕪穢自擷芼。曹鄴喻鄙淺。或僅比滕鄴。深慚鬻鼠璞。豈曰銜圭瑀。結束整壁壘。指揮聽旗纛。一字華袞褒。私心默相禱。鵠雛在穀穀。魯雞易爲抱。鵠首滯灘潭。天風易爲漕。覲面失師資。空增後追懷。願分全鼎潤。稍出一轡犒。平生死文字。辛苦用自勞。

酒後呈蕉飲庶常

前身合是荒山僧。見人木強如癡蠅。史君於我乃何取。曰此可愛非可憎。結伴相尋不辭遠。篋與出郭當時曾。滿廊紅桃風敗盡。屋頭雨腳蠶於繒。賭詩聽雨夜不睡。吟聲出屋更相摩。汪侯老筆健如虎。君更快若秋空鷹。死生貴賤誰料得。詩人邱墓高峻嶒。君披褐衣走別我。歸著宮錦高軒乘。文章有神豈不信。妬口妄說天憎憎。嗟余只合安窳劣。梯雲萬丈何由登。荒廢山田弄書史。頗躓窮餓吁可矜。世上幾人談故舊。貧交滿眼皆羞稱。看君意態迴流俗。與昔未達無虧增。胡然嘖嘖被說謗。從來斥鴳欺鷗鵬。彼自藩籬

誇臂距。君自雲海憑掀騰。鄙言挂口吾過矣。得酒且醉今猶能。惜君欲飲不蘸盞。助談曷不加三升。錫山名泉香且冽。花豬旋割魚新罾。炮煎方法盡可口。盤盂花樣俱時興。主人自醒客自醉。口吻一種生鋒稜。說虎崩騰雷吼屋。說鬼慘淡風吹燈。葫蘆撒徧了不忌。僮僕失笑何須懲。月轉虛廊夜如水。天雲幻作波層層。安得一箇橫素手。吹徹雲月空天澄。更深柝柝不聽去。脫復食頃朝陽昇。少年努力縱談笑。用杜句。英待鬢雪垂鬢髻。汪侯已臥蜀岡底。頗覺地上無高朋。兩人興到有狂詩。詩成莫使人鈔謄。

附史京邸寄詩。誰能花雨尋名僧。誰能拔劍驅蒼蠅。賞奇易敗俗物意。好妙反被么麼僧。眼前顧子才橫絕。古有其人今未曾。獅兒踞地吁堪怕。神駿脫韁誰敢繩。絲孔啾啾易悅聽。霜鐘鐃鼓無人聲。猛思笑視且摩挲。徑欲逐狗還呼應。旁人怪我意色惡。不若方寸原峻嶒。倚子豪極氣益鼓。看余興到狂堪乘。前年拉臂大橋市。春陰月黑天如菅。江口百步風霧亂。圖峯窮蹙無由登。我輩要須妙胸次。臭味並合非驕矜。山川文史亦底物。不過真賞皆虛稱。雙丸易去人易別。吾學不殖竟無增。君名益大厚根低。何異擊水南溟鵬。羣公已許霸壇坫。睥睨一時容盡騰。久知道顯君自有。所請推引吾無能。蕭然冷局溷鉛槧。日竊虛祿謀斗升。海邊似爲鷗所畏。寒潭豈有蛟可憎。容盡騰。久知道顯君自有。餓鍊靈能興。坐此結習剝磨盡。鐵可繞指。無稜。里居二處君所見。銜杯時共秋堂燈。對牙吮血橫被噬。吹噓或者驚常態。入小相知不相信。觀面咫尺山千層。此心可鑑點窮釋。青天歷歷冰輪澄。幾時京雒一聚首。丹梯拾級留君昇。詩成夜半窗影走。老樹欲作人鬚髥。寒鑿二尺古時鐵。序塗此亦耐久朋。照我封書急寄子。短幅莫厭蠅頭勝。

田家

高田彭彭打麥聲。低田瀾瀾水車鳴。老嫗執爨婦芼尊。小奴活捉黃雞烹。烹雞未熟圍頭坐。餅飢何妨比盤大。前村酒望高入雲。那討青銅三百箇。

銷夏灣

山借林爲妝。林因水爲鏡。水得石益奇。四美難交併。是中適兼之。百態秀而靚。陰交樛櫟古。翠染山衫淨。虛巖隱鹿迹。幽窟馴龍性。九莖仙草弱。五鬣虬枝硬。琤璫哀玉瀉。的皪涼珠迸。白鳥靜翹翹。白蓮香柄柄。蕭森三伏時。不受炎官令。正晝日指威。當暑秋爲政。夫差昔王吳。雄據誇豪橫。射鶚上高山。圈虎開深甯。盤遊到處留。佚樂於茲更。風亭倚礪斜。水殿常峯正。至今採菱歌。猶聞溪女詠。山川歷幾劫。林廬更幾姓。惟有嶺頭雲。無心亦無競。

余患不寐。陳山農療以藥酒。分其半餉。查夏重有詩見謝。次韻奉荅。

更深紉紉應海澠。湖風夜動鳴湖波。一身一影撥燈坐。破衾堆疊團成窠。屋頭土梟呼不已。如擁百怪紛殿呵。黠鼠欺人弄伎倆。窸窣四壁生妖魔。幾回掣劍激壯氣。浩歌狂舞寧知他。雙睫甫交落孤枕。四體不關叢百痾。遊心瀟逸逐奔馬。幻身輾轉旋枯螺。沈沈敝幃垂四角。如簞困鳥籠囚鵝。明就陳翁急診視。心靈夜氣須調和。刀圭未覺寸田潤。瓢杓已遣衰顏酡。華胥有路不難到。取徑合自糟邱過。曲肱漸入混沌譜。調息竟奏雙門歌。且當化蝶舞寥廓。豈必得鹿藏山坡。黑甜軟飽兩不惡。黃雞白日如吾何。查生就我分一斗。右提不律左叵羅。吟情飲興互觸撥。問君所得孰與多。待我日高丈五隄新足。看君潑墨傾洪河。

雞籠山

筠籃采藥翁。導我過雞籠。羣木暗如夜。孤鷗嘯有風。雨留麋鹿跡。香得蕙蘭叢。不落荒寒地。詩材孰與供。

集放翁詩次菌次太守歸湖韻

喜挂高帆浩蕩行。飄然雲水不論程。尙嫌塵境妨幽致。肯信秋毫有妄情。邨酒可賒常痛飲。野人有舊得尋盟。扁舟來往無窮樂。夜夜潮中看月生。
兩扇荆扉數掩籬。竝溪穿塢每歸遲。客撐小艇招垂釣。僧趁分題就賦詩。豪竹哀絲眞昨夢。晚菘早韭恰當時。紅塵朝暮何時了。此老醉眠初不知。
偶來從倚草亭孤。到處皆成一畫圖。疊疊沙痕留浦岸。蕭蕭秋意滿菰蒲。意行舍北三叉路。跬步門前萬頃湖。聊舉一盃生耳熱。醉中猶攬故人鬚。
五百年前賀季眞。天將閒處著閒身。吾曹自欲期千載。外物元知等一塵。錦雉白魚供野餉。黃雞綠酒聚比鄰。醉中卽是逃名地。本避浮名不避人。
頻拈枯筆賦幽居。歸老林閒計未疎。尙憶青衫陪衆雋。不論黃紙有除書。壯心耿耿人誰識。胎髮茸茸漆不如。閱盡滄流身獨健。敢辭老境落樵漁。

題弗郎單馬圖

弗郎·元一稱佛

相馬莫相黃與驪。畫馬莫畫肉與皮。閱盡廐馬四十萬。中有一馬眞吾師。蘭筋瘦露雪毛緊。汗溝珠落紅淋漓。弄風跑地立不定。虎氣不受人銜羈。畫師熟視縮兩手。粉墨飽蘸何由施。心通馬語墮馬腹。蹴踏嘶

頓無不爲。偶然眼中真態現。仲紙急追愁失之。至今展圖愛毛骨。徑欲呼鞍乘以馳。余吾之水隔萬里。造次那得來權奇。得非曾駕穆天子。七匹老死一匹遺。不然貳師空國獻。獨留孤種真龍兒。豈知神行電邁。遙絕足。所向不許千蹄追。手操長鞭鞭者誰。烏靴狼帽鮮卑廝。此曹那知惜騏驎。坳折項領求馴隨。枯其三斗強飲秣。破屋一繩長繫維。請看往世珠韁寶勒黃金聲。行隨大駕飛龍旗。鬚翦三花身印字。奚官小臣不敢騎。天育攻駒香水沐。長秋遊牡清風吹。腹飽雕圓四蹄重。十步喘汗五步疲。坐失此馬荒江涘。驢羸駝駟叢姦欺。驤首長鳴淚雙落。借問王良知未知。

秦之俊

字來勳。江都人。康熙丁巳舉人。著有編年詩一卷。

和吳蘭次歸湖原韻五首

不須惆悵重行行。曾覓桃源幾問程。世上浮名多變態。眼前舊雨最關情。村春近得東西舍。沙鳥新邀泉石盟。莫謂投閒堪穩臥。其如不出負蒼生。
卜鄰幸得近東籬。步履頻過不厭遲。瓦注金尊傾舊釀。紙窗斑管賦新詩。青山結伴從吾好。白首同歸復此時。仕隱由來稱落落。高懷未許俗人知。
閒吹鐵笛海雲孤。豈必南溟是壯圖。秋水波時聞木葉。夕陽斜處泛菰蒲。寒泉勿幕仙翁井。夜月平分甕社湖。我欲從公數問字。幾回甌酒遣長鬚。

拂石眠雲傍水濱。年華歷盡賸閒身。三條裁製山中服。十斛先消陌上塵。茵菖齊闌香到枕。薜蘿挂壁綠爲鄰。蒲團靜息如枯木。豈有肥羶作戰人。

丈室橫琴賦索居。交加竹樹儘蕭疎。壁窠屢蘸金壺墨。煮石頻緡玉洞書。脫畧似君誰得似。羈棲如我復安如。應知此地烟波闊。不是磻溪亦可漁。

秦

熙字予寧。號鶴汀。來劬熙子。著有詩藥一卷。

書遺訓後二首

人生無百齡。修短常不偶。慨念父與兄。壽俱五十九。我生今齊年。未卜存與否。卽此已中壽。得天匪不厚。容膝屋數椽。負郭田百畝。辛勤五十年。惴惴先澤守。珍重所留遺。千金存敝帚。早生泣孤露。力學苦無成。生兒多不育。門戶誰與撐。兄子嗣爲子。庠序已蜚聲。零秋歎蒲柳。老淚徒縱橫。焚焚餘弱息。負荷誠匪輕。常恐遺緒墜。有忝爾所生。書以示清白。期子成令名。

秦德輔

字子衡。號伊莪。江都人。鶴汀弟。善書法。似張卽之。生平脫略不羈。所著夢中遊草詩一卷。

黃陵廟弔古二首

黃陵廟前水拍磯。一雙屬玉背烟飛。綠雲不盡蒼梧恨。冷雨斜風弔二妃。秋到湘江風雨多。九疑如黛奈愁何。夜深望斷雲旂影。露冷芳洲杜若歌。

鸚鵡洲

翠羽今何在。沈沙舊有痕。隴頭雲已斷。江上賦誰論。暮雨憐芳草。荒烟夢酒尊。獨留狂骨在。千古泣詩魂。

秦德亮 字又陶。號義山。江都人。鶴汀弟。幼工文。壯而舉子業。縱情文酒。著有詩藥一卷。自來劬至義飲詩。皆序堂太史製手訂。總爲敦素堂遺詩四卷。

葉縣

舊封尋應子。古堞問昆陽。縣爲古應子國境。有昆陽故城。山色黃城晚。河橋渚水長。堪嗟巨無霸。欲弔沈諸梁。遺跡千年沒。高原落日荒。

陸大珩 字思白。號微門。泰州海岸人。年三十早世。著有微門詩存二卷。

尋呂涼州江村故址

古樹斜陽淡一村。閒尋野老話黃昏。花堦覓路今無主。水竹編籬舊有門。塞港依然飛荻絮。斷橋誰復見潮痕。可憐一代詩人地。衰草寒烟夜夜魂。

吳文煜 字四周。儀徵朴樹灣人。候補知縣。仕東莞新會縣丞。著有詩集一卷。

贈四川劉小冉戲用八劉典故

藜火曾逢太乙燃。真能說易語便便。墨莊消受書連屋。酒肆浮沈鋪竝肩。炙手量能容婢獲。枕戈才足靖烽烟。盛時合遇鍾離薦。莫愛廬山自在眠。劉向。劉惔。劉式。劉伶。劉寬。劉琨。劉琨。劉平。劉渙。

張元進

字嘯門·儀徵人·文筆峭刻·爲沈廉使廷芳所稱·著文七篇·瓊言約記一卷·詩一卷·

初夏卽事

質簪千箇蔭窗紗。午夢初回乳燕斜。晴久未嘗雷後菌。春歸才試雨前茶。閒拈斑管題蕉葉。小插銅瓶摘豆花。鎮日科頭據長榻。綠陰庭院最清華。

史

順字天循·江都人·蕉飲太史之叔·著青蓮閣集四卷·其五言如槿籬聞夜紵·浦溆出秋燈·順月滿嫌亭翠·煙消惜棹疎·七言如得於未見常留意·贊似曾經不改歡·皆清雋可誦·

九日登高

霜高初過鯉魚風。與客登臨興自同。衣弊酒添連日跡。病多詩覺去年工。身憑傑閣危闌上。秋在丹楓白雁中。倦眼欲舒霄漢外。不堪雲影半寒空。

吳世釐

字幼日·高郵人·康熙戊辰進士·以編修直內廷·遷中允·適里中忠水·幼日請於巡撫御史李陳常·發米三千石·設廠賑粥·全活甚多·

和家鏡菴韶贈別

十年負痛常爲客。今日相逢意黯然。世路不堪成浪跡。旅人無計整歸鞭。甓湖波冷蛟潛影。金櫃雲深鳥習禪。先伯吾菴在金櫃山·君去不須揮別淚。浮沈身世一漁船。

白髮憐君心獨苦。垂頭欲語更潸然。悲歌燕市頻沽酒。躑躅征途懶着鞭。往事只今猶屬夢。此身那得便安禪。湖光春色猶相待。破浪應乘萬里船。

石爲松

字五中。號樊山。通州人。康熙辛酉舉人。戊辰進士。由縣令歷官戶部員外郎。令靈邱時。嚙臂丹起順。羽

左驗。以六百年被占之地。歸之原主。遠近傳以爲神。又縣有雞脚村。環村懸梯險絕。明末馬氏。避兵其中。聚族而居。貞固歲徵六白金。抗不納。歷來苦之。單騎往諭。即解服樂輸焉。先是撫軍年饒堯。勢張甚。值歲大旱。差宜嚴徵。道徵民課。崧時祈雨。糧壇。就燭焚其檄。持檄者訴於年。年曰。若老名士。風居下僚。固宜有此。後撫軍張公廉得其異政。甚嘉之。報最第一。未幾告歸。所著有樊山詩集七卷。

鴈門關

晉代松杉漢代邱。雄關獨上倚清秋。平吞朔漠三千里。橫截燕雲十六州。野水有聲寒出塞。青山無恙晚常樓。武安祠下烽烟色。今古催人易白頭。

題何左車千巖萬壑草堂圖

我有南村卷。秋江寫釣徒。余家江上。禹鴻。臚翁基作此圖。十年虛願在。三徑草堂孤。忽話山中事。真憐輞口圖。他時擬訪

戴。半榻肯分無。

山行

徑轉山逾逼。雨餘秋更清。石疑逢虎踞。楓欲礙人行。巖冷飄叢桂。泉香熟晚秔。人家何處是。烟際有雞鳴。馬西齋刺史。出示尊人文。毅公草書字彙。敬賦長句。蓋公被熱粵西時所集。目錄小楷。顧夫人筆也。滇南妖鳥啼點蒼。蒼梧穀蹇隨飛揚。夜呼一軍朝盡甲。孤城晝閉天無光。中丞秉鉞臨要荒。衝冠髮指鬚戟張。倉卒變生連肘腋。搏風有翅安能翔。前呼禿鶩後鵠鵠。吁嗟困此孤鳳凰。兩雛潛飛度瀟湘。丹山巢

傾卵不傷。嗚呼我公盛文章。書法直逼鍾王張。尤工草書兼衆體。上溯漢晉中隋唐。支分派別搜羅遍。拈
撫宋元至有明。叶方公被塾閱四載。重檢舊本披縑紉。百獸奔馳羣烏駭。一點畫詳偏傍。有時翻新出
己意。銀鉤蠶尾相炳煌。自公大義殉封疆。一身以外同糝糠。孤兒夜哭尋遺跡。尙留破篋歆古牆。蠶粉剝
落蟬蚪字。剡藤零斷龍寶香。有美一人婉清揚。冰玉爲肌鐵爲腸。蠅頭小字何琳琅。與公騎鶴白雲鄉。賤
子訪舊池水陽。維公季子邦之良。示公遺墨縹作囊。薔薇盟手捧珪璋。逡巡注視一詞不能贊。惟覺目眙
手顫舌且僵。君不見靈風颯颯來紙上。瑤光墮地森寒芒。

雪霽登毘盧閣望西山放歌

我登高閣上。對面城西峯。但見太行東走渺無極。翔舞鸞鳳騰蛟龍。又見殘雪的嶠山之坳。日光晝射冰
稜消。此時下界纖塵都不翳。浮空萬仞飛寒翠。仙人恍把玉芙蓉。古佛正映青螺髻。我昔曾爲汗漫游。四
百寺前烟雨秋。石壁倒鋪沈潭黑。鮮霞朝冠蒼苔幽。更騎代北馬。往來三關頭。秦城山腰縈如帶。長虹宛
宛渾河流。舊夢倏過那能記。十年不踏燕山地。短衣何事逐風塵。聽鐘又住城西寺。閣上正春風。嚙望天
濛濛。千山萬山森足底。嵯峨忽起難心胸。人生萬事亦何有。轉眼朱顏成老醜。還攜綠玉杖。去問采芝叟。
青山可識向來人。臨風酌爾一杯酒。

戊戌秋日。余請假將歸。偶過慈仁寺。有持戴文進漁翁畫軸求售者。貌絕肖余。因購之爲小影。

二百年前戴文進爲我滄江寫釣徒自我翻身向雲海雪上鴻爪知有無我今復向人閒小遊戲。曩日青山都不記昨夜夢戴公忽語三生事書廊小畫誰所懸對面鬚眉渾莫二破笠露頂赤雙脚客箸挂腰粗半臂憶昔并州人曾爲貌余真身騎代北馬飛馳古塞門近年昭陽禹君亦好手點綴南村五楊柳更作荒村子月圖把卷蕭蕭風夜吼我每披圖增嗟吁少壯幾何老相隨豈知事前定戴公乃我師買歸頻照鏡獨坐更傾杯杯乾一笑相爾汝底事令我異故我不願短衣逐李廣亦不願方目比陶公行吟但學天隨子知足聊同邵曼容

擬古樂府一篇爲張孝子賦

頭白烏屋角啼黃昏鬼哭聲嘸嘸父死未葬城已圍父棺不保兒去欲安之一解兒去欲安之賊兵來拊棺涕泣前致辭賊磔我指流血淋漓二解斫頭不惜何以怒爲有孫出救刳屠不異豕與雞賊懸兩刀以邀以嬉三解頭白烏田閒啼賊兵去遺民歸老僕走相尋載之廣柳車僕亦不願生地下相追隨四解鄰大歎息歎息涕漣漣齊拜孝子墳墳旁築高祠社鼓琴琴酒滿卮神之來兮張兩旗不見烏啼見鶴飛五解

寡鵠篇爲泰州儲節婦賦

鵠之寡兮單居唼苕藻兮哺孤雛彼梟何來吁嗟梟兮匪汝匹儔叶除梟怒殺鵠毛羽催頽鬼覩其魄一解

梟隳不能飛。二解

東鄰張羅西鄰轂。執此凶醜會須付鼎俎。三解

誰何者叟請爲梟憐。梟烹亦良苦。鵠

冤誰與填。四解

天怒有赫震來其虩。攫梟中途南山芥鵠啄梟之腦。喋梟之血。五解

衆悲填膺梟伏其辜

兮鵠不再生。社鼓瑟瑟兮旨酒一盛。平聲

千秋萬歲兮神之來如流星。六解

沙

鼎字梅佐如阜貢生官廷昌州判制府賞其能嘗以十五萬餉滇軍先期而至雖勞苦中不發詠吟沒于官

詩宗少陵贊到村曉七律真傳行世太倉王顧菴援長州韓蘆茨宣城梅

過平彝縣遊清溪洞

山城烟霧裏帶雨度清溪路滑星軺怯林深玉洞迷苦痕侵佛座花影落雲梯竹過翠微處留人山鳥啼

白雲坡

四圍碧嶂橫如黛萬疊青松響作濤却羨山僧行脚處重重石徑踏雲高

新秋大雨宿滇中霑益州驛館

昆明七月似深秋風雨縱橫滿驛樓漏盡荒城連鼓角寒生孤館入衾裯一宵夢阻長淮地萬里山圍古

益州心緒天涯搖落甚不堪孤枕聽寒流

史中義

字蕉飲江都人童子時廉使金長真觀風七郡拔第一吉水李尚書視學江南試霜鐘義社球光二賦

以中義對上管賜御書綬幅以示嘉獎已卯典試雲南孤清高寄頗爲世重歷官禮科掌印給事中以疾告歸

生平以王文簡爲師以姜西溟譚樂亭吳天章查夏重何義門爲友里中論詩與殷彥來顧書宜嚴密歸

晚年好笠乾家言。詩旨益臻冲淡。所著有蘇城集。卷。使濱集三卷。過江集四卷。過江二集四卷。

奉命之滇南。陸辭紀恩有作。

十年簪筆侍西清。叱馭初爲萬里行。才婉輜軒周太史。心憐池水漢昆明。楚人解誦相如賦。蠻女時登諸葛營。指點南中多氣象。彩雲曾使武皇驚。

荊州懷古

郢都高築渚宮開。風雨三湘七澤來。江上射麋公子轡。宮中滅燭美人杯。齊秦割地無長策。屈宋憂時豈賦才。火入夷陵三戶少。細腰臺殿總成灰。鼎足孫劉勢已成。霸才無主日縱橫。天連巴蜀方爭險。地接襄樊好用兵。野草自荒劉表塚。愁雲不散呂蒙營。公孫當日依人者。長簏危樓百感生。江左安危踞上游。六朝門戶擁貔貅。鼓鼙處處喧南郡。烽火年年照蔣州。封豕長鯨勞上將。金楨玉幹比強侯。枇杷門外梁元帝。眇眇眞爲北渚愁。葉葉風帆月峽過。虎牙山勢遠嵯峨。人家折竹常驅鬼。士女分棚戲拔河。長袖知誰工楚舞。短簫吾欲聽巴歌。江陵從道衣冠藪。何獨琵琶比飯多。

辰龍關

松勢接遠阜。十里寒濤聞。峻嶺削萬丈。排突青冥分。白光凝積雪。黑氣屯高雲。天長誰劈劃。鬼斧開氤氲。淩競度一騎。何以通千軍。往者鯨鯢橫。填海連楚氛。辰陽楚門戶。此實豺虎羣。五溪毒淫隄。銅柱誰標勳。函谷一丸泥。塞險何足云。徘徊下關路。合沓蒼烟曛。

鎮遠

金筑咽喉地。嚴城管百蠻。交流鐵溪水。倒影石屏山。驛騎紅塵合。寒廳畫戟閒。驩連十五洞。爭看使星還。

平越

萬壑啼猿擁郡樓。黎峨風雨起深愁。千林簞黑連龍里。百部烟昏接播州。幾見漢唐通貢使。誰能兵甲服蠻酋。三江不獨羊腸險。處處濤聲水合流。

瀘溪縣舟次述所見

架屋懸厓萬仞梯。明窗洞戶棟雲飛。三危露入金人掌。九子鈴聞玉女扉。天外紅牆城隱隱。空中黃篋路依依。鵲巢向背蜂房亂。蜃海樓臺見亦稀。

過洞庭湖作

洞庭波綠搖晴烟。紅苕碧杜紛芳妍。孤槎陰陰宿水國。袂衣夜半生春寒。北風湖上三日顛。浪捲銀屋浮湘川。模糊不辨郢中樹。蕩瀟欲吞雲夢田。軒轅咸池大合樂。叢鈴碎珮雲旂翻。魚龍空濶舞曼衍。巴蛇積

骨空邱山。蒼梧帝子去不還。雲和寶瑟無人彈。窈窕山鬼嘯春竹。二妃玉泣啼痕斑。懷沙恨遠迷江潭。楚雲湘水天連縣。章華路迴鄂渚斷。漁歌夜悄空江船。繁星歷亂春風旋。君山松檜旭日鮮。湖心浪假玉盤出。赤沙青草無鉤連。沉澁清波漾明鏡。衡巫遠黛拖高鬟。神鴉舞棹不肯散。鶉鴒聒耳鷓鴣喧。吳舸蜀艫交若織。巴童羌客帆爭懸。中流簫鼓亦怒激。老龍盡抱驪珠眠。揮手辰陽八百灘。楚天森森湖雲寬。巴陵堞樓忽在眼。岳陽霽色明高檐。

里門懷古詩八首錄四

董仲舒

廣川有大儒。出身事漢武。天人三策對。略已動英主。不肯媚曲學。同列多懷怒。妒既起公孫。讒復遭主父。鬱鬱膠西相。落落江都輔。獨欲尊孔氏。百家斥不取。卓哉漢儒宗。絕學邈千古。感士賦不遇。無人可告語。擬對高廟災。危幾迫刀俎。私家撰官書。得禍可勝數。班氏傳西京。奮筆特褒詡。從來悲賈董。才命蓋相忤。

謝安石

謝公擁節旄。談笑鎮揚州。一門佳子弟。珠玉充道周。翩翩裘屐閒。賓客皆上儔。絲竹與山水。癖好聯清遊。雖有期功戚。亦不廢歌謳。兒輩乃破賊。碁局了不收。縱然屐齒折。鎮俗度原優。想常擁鼻時。豈爲富貴謀。奈何遭流言。小草竟蒙羞。起捋桓伊鬚。聞箏涕橫流。嗟哉東山志。華屋俄山邱。蒼生如公何。百身莫可留。

羊曇鞭西門。馬行亦悠悠。乘醉發大恟。茫茫叢百憂。長吟繡虎句。千載難爲酬。

鮑明遠

顏謝無優劣。文章竝冠冕。延年不自信。私問鮑明遠。美哉鮑生才。不因門閥顯。史官何無識。乃以人微貶。脫非虞散騎。生平無可纂。相時善投主。致身非所短。恥同燕雀羣。才地思一展。如何遭梁武。身亦長偃蹇。文章有何罪。蓋由時命舛。惻然松柏篇。憂生卒未免。一紙報妹書。大雷走窮喘。竟參臨海軍。難脫虎口險。

杜牧之

昔者牛僧孺。淮南節度使。幕府旣多賢。尤愛杜書記。輕狂一書生。醉臥平康肆。公旣重生才。不忍逆其意。密使邏卒護。夜報平安字。某年又某日。書記宿某氏。杜生憐不知。公前猶深諱。公勒邏卒帖。一一出相示。衆賓皆嘆立。杜生且伏地。慟哭至失聲。爲下百斛淚。古者賢豪人。憐才乃如是。士苟有胸腹。得無感遺事。低首奇章公。我今仍雪涕。

夢就宿寺院題一詩醒後誌之

寥落齋鐘起。庭陰過晚涼。匙翻松菌滑。鉢浸藥苗香。禪定僧房掩。塵消佛鏡光。祇攜巾拂至。欲憩道林牀。

懷郭于宮

墊角才名冠內廷。夜吹藜火照人青。彩毫重補中州集。一瓣香留野史亭。

李

字涪源·
湘江都人·

登琅邪山

琅邪山色古·開闢始何年·白接雲邊海·青扶谷口天·齊封空浩劫·秦碣臥蒼烟·落日荒臺上·西風暮颯然·

趙有成

字子淑·號明江·江都人·康熙己酉·兄五茲爲慶遠守·乃遊粵西·爲浮湘集二卷·又著三山集若干卷·

抵漢口

孤征窮水驛·今到漢江頭·澤國舟爲市·人家竹起樓·烽烟消鄂渚·士女習巴謳·始信湖湘美·蒼茫萬井秋·

山居秋懷

秋深諸將渡黃河·獵獵旌旗捲白波·落日哀笳嘶鐵騎·古城烟草沒銅駝·冰霜萬里催芻粟·砧杵千家黯綺羅·部曲健兒喜新捷·西風滿地起鐃歌·

汪修武

字聖昭·歙人·占籍揚州·著雙瞻閣詩集六卷·

秋夜

露坐宵中月·清景延幽賞·孤烟下桐葉·靜愛庭除敞·秋花媚暗徑·繞砌寒蛩響·縹緲思瓊樓·直欲凌風上·

吳寅

字秩三·號寶廬·江都貢生·壯遊三十年·歸臥北湖黃廷橋·博學能文·詩學南宋人·著有夢硯居詩集四卷·

移居黃子湖新賃茅屋

一亭偃蹇寄乾坤。斗室何辭費討論。椽蒿香茅搜鼠婦。離編新竹護雞孫。不妨杜甫愁吹屋。却被劉伶笑入禪。戶外烟波渺何處。滿湖風月一江村。

楊維漢

字倬雲。江都人。

邗溝

滯繞郡城邊。功成記漢年。千航馳驛路。一線入江天。雨雪春浮漲。鶯花暮泊烟。北連湖上埭。高築費金錢。

汪玉珩

字非寶。儀徵人。康熙辛卯舉人。

聞鐘

旅舍花宮近。疎鐘隔水鳴。數聲江月冷。一夜客心清。夢斷官街鼓。塵空佛塔鈴。殘膏吟未了。漏已報三更。

王

權

字□□。興化人。

幽棲

露冷兼葭水一涯。板橋低接野人家。移蕉已放疎牕綠。種柳初飛小徑花。幾日典衣沽美醖。常時洗碗淪新茶。素心脉脉知何處。秋在簾鉤落日斜。

張圯授

字孺子。如皋人。

得許山濤書喜蔣山老人將歸舍桴蘭若。

昨得故人書，遙傳方外信。白雲倦孤飛，金策行將振。自非入世身，詎爲風塵困。江南有茅菴，松菊荒滿徑。屋角羅蛛絲，秋風冷石磬。頭白好歸來，山中續清韻。

朱

灃字天綺，江都人。

哀鴻歌

迫促迫促哀鴻歌，我對君歌涕泗多。君聽我歌勿愁絕，我爲細作哀鴻歌。六月霖雨河隄裂，長淮極望炊烟滅。浮屍壓水水不平，橫流飛雨雜悲鳴。可憐定數誰復挽，悠悠視此鴻毛輕。漉屍老人向屍哭，收屍結束埋山麓。東鄰昨歲死飢寒，西鄰八口填溝瀆。而今江海復洪濤，荒月荒烟孤竄伏。水勢激蕩接續來，僅留殘喘顏如灰。敢怨流離無寸粒，獨哀老病收遺骸。我聽此言淚沾臆，十年菑屋思安集。天雨傾盆地軸翻，全賴仁侯救呼吸。草寒沙瘦千餘里，吏胥徒知嗜枯髓。但存皮骨少金錢，紛紛敲朴胡爲爾。稚兒曳母嬌不行，哀哉寡婦哭兒聲。昨鬻茅舍今鬻子，骨肉斷絕情難死。誰能傳我哀鴻曲，哀鴻之曲真迫促。

沙鍾珍

字彥發，號席公，如皋人。

步君山寺

南洲維小艇，散步到禪關。雨歇池邊樹，雲歸寺裏山。鐘聲連塔動，鶴影見僧閒。一抹橫江翠，孤帆自往還。

燕山雜詠

陵樓高閣逼青霄。天外羣峰倚寂寥。但見玉泉噴石髓。誰知古殿自金朝。丹山碧水流虹帶。綠樹青雲映綵橋。多少幽人閒眺望。清風明月好逍遙。

丁其錫

字天予。號殊齋。如皋人。

素風堂銷夏

塵消如暑退。清賞集天涯。白石留春蘚。黃花落晚槐。雲深迷俗駕。風好敞虛齋。更作碧筒飲。陶然共寫懷。

朱國琦

字鶴山。號蠲翁。興化人。

九日雅集分韻

蟲吟苔石亂。雁度暮烟長。訪菊添詩興。持螯助酒狂。故人俱白髮。嘉會又斜陽。好有初弦月。娟娟到草堂。

卞元彪

字瑞蔚。江都人。

秋日感興

閉門卽是入山深。隔俗人誰託素心。夢裏秋光荒似蝶。詩中清韻冷如砧。旣經芳草隨鞭斷。莫把黃花壓帽簪。好竹一園蘭一畝。更須收拾舊光陰。

陸

珂字佩玉。興化人。

春日步昭陽山

春風導游塵。擷芳入幽谷。長松晝生陰。細草晨鋪綠。窈窕石上羅。參差山下屋。清泉挂樹飛。白雲懸崖宿。崢嶸立復行。採芝忽盈掬。適與樵子遇。和歌不成曲。吾將築香茅。翠倚琅玕竹。

王拱辰

字新維
江都人

春日登眞賞樓望江南山

選勝名場愛勝遊。蜀岡風景匯中州。六朝烟柳春如海。三月鶯花客上樓。紅映綠櫓新醞撥。碧堆青髻遠峯浮。眼前有句無遺却。莫道騷人只賦秋。

王

字李守
興化人

由蓼城至東郡道中

長淮飛匹練。東下疾無聲。萬閭連雲築。千帆挂雨行。亂山藏蔡邑。高霧失蒙城。日落投何處。江樓畫角鳴。

秦定遠

字快御
秦州人

曹正子有綠水送春帆之句。同諸公賦贈。

渺渺春江帶淺沙。綠楊低影布帆斜。攜琴安放山陰棹。載酒輕浮魯望家。點點綠烟飛燕子。飄飄紅雨泛桃花。扁舟一路波如鏡。相送東風到若耶。

不得詣智者寺

迢遙智者寺。惟見嶺雲封。徑狹難驅馬。岡迴自臥龍。野人畊赤土。樵子臥青松。日暮人還倦。山僧竟未逢。

席允叔招同諸子聽花書屋讌集得條字

蕪城三月雨初消。攜手尋春度板橋。花滿青山思載酒。人依畫閣聽吹簫。隔林短槳來桃葉。映水長堤拂柳條。但得吾儕饒逸興。鶯聲何日不相招。

隋苑

柳外高樓倚翠微。上林風景鳥爭飛。長安西苑鶯花老。目斷江南君不歸。

黃九河

字天濤
泰州人

半塘舟夜贈女郎

白隄一見悵魂銷。少小曾依廿四橋。最愛館娃香徑裏。十分秋影不勝描。玉管銀箏沸渡頭。青檣紅燭散鄉愁。如何夜半人歸去。月落無聲水自流。

北上於袁浦發家書

丈夫志四方。不受兒女羈。荷懷萬里志。勞勩何足辭。昨發海陵城。今宿淮水湄。附書送行人。援筆中心悲。親亡兩弟弱。支戶惟中閨。水旱歲頻仍。全家常苦飢。官租宜早辦。西疇勤耘耔。幼弟學易荒。肅恭承明師。回望浮螺山。先隴草離離。遠行戀所生。貧賤無歸期。苟能行直道。何懼路險巇。長安多親舊。音驛日夜馳。

紙短苦意長。挑燈重封題。欠身起簾櫳。月落村雞啼。

送毛亦史歸婁東

知君夜夜夢鄉關。夕照荒原看獨還。剩有此身娛白髮。竟無餘藥買青山。江風細雨高樓外。野樹叢雲斷岸閒。此去逢人如問訊。爲言有客鬢毛斑。

寄懷紀蕤子兼憶合肥夫子

見說柴車返舊京。雁門西望最含情。憶曾燕市同呼酒。忽復江鄉漫聽鶯。隔歲兵戈催白髮。空山風雨劇黃精。却鄰買駿逢知己。痛煞金臺是樂生。

黃九洛字姬定。泰州人。

九日期趙庶先生登高阻雨留飲小齋

兩兩青山阻屐痕。蒼苔空自掩柴門。黃花香冷烟三徑。紅葉聲疎雨一邨。客似孟嘉誰落帽。主非陶令獨開尊。秋光自在幽齋裏。且把茱萸細討論。

淮海英靈集

張發生

字桂石·一字樂江·江都人·居東鄉浦村·雍正癸卯武解元·弟發奇·亦是科武舉·丁未同登進士·並授御

秋風一鶚南天起·一時以爲盛事·歷任定州參將·以終養告歸·丹陽於一川震·贈張將軍詩有云·將軍弱齡便筮仕·大貝南金光滿紙·中黃虎賁皆歎息·銜霍當年詎有此·牙旌節鉞正有加·野服翩然返田里·結交遠近皆鴻儒·置酒高歌未有已·所著有歸田集·洪露書堂集若干卷·

憶迷樓

風雨瀟瀟故國秋·隋宮舊跡古揚州·三千粉黛爭新寵·只願君王不下樓·

汪應庚

字上章·號雲谷·歙人·業經子揚·遂籍江都·富而好禮·篤于宗親·雍正九年·海嘯成災·作糜以賑伍祐

續作·更設藥局療治之·十二年春·復運穀數萬石·使得哺以待麥稔·是舉存活九萬餘人·又于鄰邑之丹徒興化·皆輸粟以濟·大吏上其事·特授光祿少卿·郡邑屢舉鄉飲賓·辭不赴·又嘗出五萬餘金·修建府縣學宮·以二千餘金製祭器樂器·又出萬三千金·購腴田歸諸學·以所入供歲修·及助鄉比士資斧·至今永著爲例·士人稱爲汪項·乾隆三年歲飢·首捐萬金備賑·及公廩資賑期竣·更獨力展賑八廠·一月所賑·至九百六十四萬一千餘口·又興復平山堂·建五烈祠·並爲請旌表其墓·在城之貞節祠·亦改而增擴之·暇時頗與賓客倡和爲樂·不自以詩名·遂無專稿·于他選中得絕句三首·其人足傳·不特詩也·

登樓口占

樓際落銀河·一望煙如埽·隻雁渡長江·孤峰秋自老·

偶占

溪上聞人聲。山陰看古樹。幾峰瘦削成。正在層樓處。

春宵夜話

雨積東臯月不晴。黃鸝睡穩夜無聲。奚童烹得新茶熟。野寺鐘聲正一更。

卜

樹字古山。甘泉人。曾官豫楚。晚年歸老武。樹州。著有存於集二卷。古山紀年詩一卷。

寄懷吳小眉編修

遙見瓊枝出上林。等閒憔悴憶分襟。不堪春病新疎酒。爲忌窮愁久廢吟。十載風塵遊子恨。尺書迢遞故人心。城西蕭寺還如昨。孤月常教夢裏尋。

將之鄂渚漫成二首

銷盡黃金敵黑貂。飢驅又逐楚江遙。頭銜漫說參贊府。俊逸何人似鮑昭。曾記僧寮醉月殘。清光孤影共盤桓。江州舊雨新遷客。十載重遊興未闌。

伍之麟

字瑞徵。號松山。儀徵諸生。性孝友。故爲詩多沈摯樸遯之音。五言如作客悲秋晚。挑燈坐雨遲。雨。旅客應劇。愁覺暮春深。時一刻畫。終歸平淡。歿後其子越。越。起。顧其詩。爲自怡草遺稿二卷。

與張元亮吳天士草亭望江

高閣空遙目。江山擁大觀。天低峰頂樹。水動石邊灘。曉日依牕永。東風入座寒。無花春自媚。晴翠滿闌干。

初夏

芍藥花間露。薔薇架上香。晚風輕燕小。初夏短衣涼。意懶雲俱緩。吟寬日漸長。夜來應有月。疎影看新篁。

同洪九疇單家橋步月

春色行將半。橋頭月正圓。塔孤雲過寺。沙淨柳含煙。堦樹喧歸鳥。稀星動遠天。幽人共來往。相對意陶然。

伍燧人

字陶公。號水軒。原名越。儀徵人。瑞徵仲子也。沒于雍正十一年。弟起。輯其詩。爲北隱吟遺稿一卷。

過訪成位六先生

投老來江寺。奇窮不解愁。鳥聲春院靜。塔影暮天浮。身靜僧爲侶。衣寒酒代裘。先生有高節。野竹一竿秋。

伍

起字鯤扶。儀徵人。

金陵舟中

柁樓人倚晚風前。萬里江流浸碧天。翠岫微茫煙樹裏。片帆搖曳夕陽邊。一聲玉笛和梅落。數點漁燈伴柳眠。獨有黃昏無賴客。離情欲話轉淒然。

伍元台

字露三。號景塘。儀徵人。陶公仲子也。邑諸生。早歿。有攝山紀游一卷。

晚泊十步橋

薄暮渡江來。沿溪背山曲。古岸柳垂陰。風吹著衣綠。短艇繫石欄。橋影明如玉。開樽對素心。小澆傾醺醺。

許嗣隆

字山禱。如皋人。

邦江寓樓喜冒穀梁至自都門

客中客到仍爲客。無意相逢意更親。十五年前雙淚眼。三千里外一歸人。正逢月好常秋夜。猶記書來是蚤春。秉燭相看非夢寐。開懷莫厭酒杯頻。

河亭

秦青歌調拂雲來。橫笛雲郎坐綠苔。唱到月斜風起處。人家簾子一時開。

陸鍾輝

字南圻。一字淳川。江都人。平山堂下。環溪草堂。爲其別墅。故號環溪。官員外郎。出爲南陽司馬。因說

陸鍾輝老乞歸。築室樓霞山中。復起爲郎中。生平篤好吟咏。著放鶴亭小稿一卷。環溪詞一卷。又嘗刻宋姜白石詞。曲詩集。蓋其所師法也。初有獵地于張漁川者。繼又獵于南圻。南圻後知之。以讓于張。張亦不受。讓于陸。馬秋玉徵君爲之解。乃共構一園。名曰讓園。有雲木相參樓。黃楊館。梅坪。遺泉。碧梧翠竹之間等處。與行菴並爲邦江雅集之地。今天宮門外少西北。杏園一帶。其故址也。

同符藥林張南芬高西堂紅橋道暑

滿湖涼影露絲飄。玉簫彈棋暑盡消。但覓藕花深處去。一篙撐出小紅橋。疎風吹柳亂鳴蟬。身在流雲淺水邊。消得玉浮梁味好。白鷗輸我醉來眠。

月夜泛棹眞州訪陳玉几

共賦懷人什。詩來江上尋。斷鴻前夜夢。孤月此時心。鶯影亂秋水。魚風吹晚林。相思清不寐。涼抱玉壺深。捕虎吟。南陽郡之內邑。遠運熊耳太伯諸山。爲虎豹窟穴。多傷人。有士之兄。亦斃於虎。泣訴於予。請爲之捕。許之。遂禱于神。并命獵人強弓擲弩。懸重賞。期十日必得。旋因公事回郡。甫下輿。聞杏花山境內。有虎叫。

吼三晝夜。中弩而死。恰在曾傷士兄處。其事頗奇。獵人昇虎到郡。養之。既而復殺三虎二豹。其患頓息。因紀其事。

南陽之佐。駐於浙川。不苛而緩。山民其歡。一解猛虎爲害。戕及士夫。弟來投牒。拾地以呼。二解時維三月。藤木交發。強弩毒矢。布於虎穴。三解藐茲忱悃。幽假山靈。俛魂在旁。驅虎服刑。四解蠢爾醜類。不死則郵。我無仁術。使爾渡河。五解

金陵移梅歌爲馬嶸谷賦

我生愛梅頗成癖。殘秋曾作金陵客。鳳臺門外訪花翁。十里香塵流雙屐。惜哉未到梅花村。浪蘂浮枝焉足論。雪中高士不可見。歸來耿耿繫心魂。山館主人興復佳。初冬遣汎空江槎。欲載梅仙對芳酌。好將香色來君家。驚濤捲雪乘流下。虬枝映水蛟龍咤。健步移將十幾春。剗破苔痕明月夜。月中疎影煙徘徊。瘦無俗骨寒無埃。一枝待放小春暖。作詩正好催花開。

朱

字眉毓。一字眉樵。江都人。詩近劍南。家有斐園。園內構中爽亭。鵲角山房。爲讀書吟詠之所。著斐園小乘四卷。

江洲雜咏

樓納雙峰塔。門開萬里江。風生時滿榻。雲落忽當窗。帆影欹危勢。漁歌送遠腔。瓦盆從友酌。倒海不能降。
送許秋屏歸里

與子忽分手。悽然立渡頭。不堪雙淚眼。遙送一歸舟。昨有還家夢。今添別友愁。花時常秉燭。何日復同遊。

春江舟次

江干舟早發。帆臥櫓呀啞。煙重山添黛。風微浪減花。纖纖蘆刺岸。隱隱雁圍沙。不是漂萍客。何煩苦憶家。

自題中爽茆亭

依山傍水架茆蓬。疊疊藤蘿蔭碧空。一壑清紆人罕到。四簷翠密鳥還通。梅花作障春常雪。竹樹當窗午自風。只是黃昏容易近。夕陽影碎一亭中。

劉永和 字豫堂。高郵諸生。性嚴重。事母孝。著古詩十首。解。子寶忠增。輯其詩爲書翼堂存稿。

九月八日晚過東匯鎮

問路長年拙。扁舟趁月光。一橋人雜沓。兩岸柳青蒼。秋水澄燈影。空煙暝野塘。吳陵明日酒。風色近重陽。

王令宜

字伯周。江都人。雍正時官建甯。以蜀中勝地。前人著述甚備。惟建甯一區。文人上夫。輒拂所不。到。因取其地之形勝風土。成絕句一百首。爲建甯新話一卷。今擇錄數首。如右軍之廣異聞也。

北山

烏巒特險弄干戈。山後樵蘇不敢過。慘絕當年避兵燹。幾人得渡太平河。

建昌先屬雲南。甲寅後。改金沙江。北爲蜀界。北山。蓋涼山。野夷窟。

穴。吳越變時。道路爲梗。居民入後山避兵。由夷地北。達太平城。渡河至嘉定。多遭慘掠。生全者十無二三。

安寧河

一灣溪水繞城西。萬戶千家灌稻畦。纔到清明農事起。燒田驅犢插春犁。

河原一出小相嶺。一出甘嶺。一出寧番。於瀘沽彙南繞神建前中德迷。

·入金沙江·數
百里·貧以灌漑·

鹽井

魚米人家生計饒·河西斥鹵供煎熬·團團惹得蠻人笑·醉買山頭啖百牢·
鹽井·去建城西南五站·道路崎嶇·獸耳巖險·其鹽因鍋形成團·計團數不計輕重·鹽務屬鹽運典史管理·足供建南上下千餘里漢夷食用·不計戶口·尤爲民便·夷人畜牧·多啖以鹽·否則必致病斃·

鐵索橋

通天欲渡無舟楫·鐵索橫空駕作橋·高接浮雲長百丈·縱然生度亦魂銷·
在打箭爐進藏必由此·其製用鐵條·間空尺許·鋪以篾席·橫加板片·行即動搖不可禁·當足著板梢及席·即踏空不可救·風起尤危險·又雅州索橋較短·此外更有溜槓·

猓猓河

策馬中流當舳舻·幾人牽拽幾人扶·莫言陸海揚鞭過·只恐波濤出不虞·
猓猓·不可舟楫渡·
衛北二十里·源自西北夷界·東南入涼山·其水長落無時·河寬里許

西塞

西征忝作度支官·日日雕樓坐井幹·覓得苦蕎團作飯·元根煨火二時餐·
壬子歲·番夷擾擾蜀邑·師行征討·予以辦餉·隨軍營往來·閱一月而逆虜授首·大軍凱旋·

余元甲

字復白·一字柏巖·號茁邨·江都諸生·資敏學博·少饒于財·以好施致貧困·然簞額無煙·苦詠不輟·
正甲寅·趙通政之垣·以博學宏詞薦·堅謝不就·詩宗韓孟·參以皮陸·乾隆乙酉·茁邨沒·嘉興蔣德·逆珣

其自訂集與遺稿·得九十六首·爲余先生詩鈔一卷·

祝牛宮辭

農事休役。戶墮向塞。牛寒不屋。霜雪侵逼。爰築其宮。晝藏夜匿。寅缺乾高。相度斜直。腰下插斧。櫟之機機。牖一絺三。陰不能賊。上茅縛苦。下木豎柵。恃母牯父。於焉宴息。或寢或興。式飲式食。耳溼而潤。角直以澤。春雨架犁。策爾一力。神官有靈。茲土是職。願享牲俎。更鑒冬醴。牝吉牯亨。俾彼蕃殖。服我南畝。子孫千億。

往湖南舟中雜感四首 選二

雲山濺濺水悠悠。之字帆張小翼舟。路漫東西鴻爪雪。心規南北燕巢秋。腳中有鬼羞塵拜。紙次生毛惜浪投。自昔魚湖堪運舫。君山從此恣閑遊。
聊因餽醴語鐙昏。觸撥心情莫可論。生計排年荒酒戶。天涯垂老傍人門。風刀不割雙眉鎖。而鐵誰噓一笑溫。猶是征衫慈母線。執裾何處望孤萱。

滯雪堂雜書

庭前山枇杷。碧翠已森拱。著花冬瓏瓏。葉大如耳聳。上栖雙凍雀。儗合共偃擁。朝飢啄瓏葉。暮寒斂細鬣。啁啾聲和柔。戢翼自矜寵。夜深忽驚墮。力薄山雪重。羽毛不自振。風冷勢難竦。何如牆頭烏。貌醜心獨勇。盡從嘉樹棲。荒木但蒼茸。突掠不自逸。健翅恣飛踊。銜茶種深山。銜麥種荒壟。

峭寒憊中人。身直忽成曲。陰雲開斗晴。半簷挂朝旭。騰騰眩暎紅。弓臂舒一暴。葦艸禁入口。枵虛類蟬腹。旬日九不飯。一日或呷粥。閑乃賤所因。嬾與病相逐。雖然困羸疲。而亦謝拘束。霜洗天宇空。門巷清以肅。牆外一尺泥。不聞車歷碌。

宿金山寺

潮撼浮玉喧琤琤。驚起客睡悽寒清。曲肱兀兀俯闌檻。缺月冉冉沈蒼櫺。戍遙不聞角聲響。山黑忽借江光明。水宿海鵲戀同夢。巖棲老衲傷孤生。天霜欲下氣自緊。塵襟頓釋情何撓。雞鳴便有人事動。舟船無數排風行。

焦山述異

江寒寺寂龜鏡昏。水府百怪幽宮屯。僧闢怪口舌莫捫。始說兩柱魚鬚樗。鰕沙大蠶旌旗繙。不知其尾何牽揪。有物瞰之身蠕蠕。龍而不角四足踰。呀呀巨口紅睛腴。兩雄相扼爭噬吞。各不少讓育與賁。一朝讎結成悲冤。老龜冥頑情轉敦。其殼大於車夾轡。犖确卓地聲嚕嚕。稽首禮佛弓肩髀。或言此是九龍子。天姥遣謁如來尊。鑿鑿而說豈不根。玉螭骨蛻山崑崙。通靈亦有長史元。南溟之鯨北溟鯢。三者一一可據援。況有咀蔗清詩存。三異·載魏墓中孝廉·咀蔗菴詩我始聆之除倦悒。繼而怖恐翻愁怨。鱗甲頑獷可勝論。魚身馬首族類繁。或牛而車或騎馱。黝黝其服朱其褱。鯨牙蠚劍行蹇蹇。陰火毒燥以自溫。幽明轍異能同轅。今師

指說眉宇軒。何異角犀牛渚燔。正恐水底驚騰奔。人世猙獰傷難言。何更幽魅悽心魂。師聞我語頭俯髡。乾舌挂壁停瀾翻。扁輪無數江之垠。急起理楫攜匏尊。共看沙月鐫新痕。

大被詠孟恭武事

恭武力學勤且敏。李肅口之而不盡。孰知母氏心用微。賢路久爲車結軫。肯厭貧寒立叮咛。但愛才彥深汲引。被十二幅手闊製。蓋覆不嫌羣士窘。慈庭拔擢具別識。轉於凍地收箭筈。勤勤夜講學自殖。根茂何愁槁葉殞。節腐水網昂魚官。德洽竹林傳孝笏。已換身絳呼上公。豈終手版作吳尹。桓任裴布著酷虐。元方覆錦來笑哂。能知大被恤士寒。子舍琢磨獲繩準。人世金壁藏篋筭。掠眼一過海浮蜃。有子不使氣類廣。何異泥滓潛鼃蚓。只謂寢處遠寒餓。業已豬龍判靈蠢。眉鬚作計每如此。其實不慈意刻忍。亦識孟母告鄰媼。義語至今傳不泯。

眞州西山村居

羣山列破窗。當窗坐晴晝。山顛走驚響。山尾飛獨鷺。老梅橫石鈎。引我聽寒溜。形如枯木杳。著花野而秀。皮僵心獨春。不落歲寒後。曲籬護老屋。架木支空林。落葉紛滿地。晴寒晝生陰。此是杜陵家。移來荒山岑。一老瘦於鶴。曝背堂之襟。前畦後亦圃。左壺右且琴。高抗嵇阮迹。永懷沮溺心。叩而笑不答。不答意自深。

送厲樊榭歸里

裹盧以食熊。漚酒以飲獮。其意豈不愛。轉與性乖刺。掃跡門已峻。籠刺袖徒闊。夙昔二三子。脫去箭離筈。夢寐企音觀。何更望扶撥。樊榭刈榛菅。不惜一芥掇。寒廳共眠食。蔬茹笑齋盃。非無喧閨地。性祇愛藜糲。筆陣猛如虎。千鈞力獨幹。時復掃秀句。修眉遠峯抹。吐論肆斐亹。問事任叨咀。夜闌戀寸燭。雖燼不厭跋。顧余賦勸劣。亦得相盤擲。何異千尺松。縣縣絡之葛。歲晚歸思動。巡行意莫奪。愁心如草根。鋤盡尙留莠。密霰未飄墜。流澌正剗割。江空風帆明。目力短能達。

遊真州西溪三首

夜宿西溪尾。朝躋西山巔。秋晴林木勁。樵斧聲清堅。源泉激寒玉。岫雲飛白絲。幽探遂忘疲。行到滄江邊。沙岸百家聚。門巷檉柳接。編蘆成水市。集網富漁業。對江山似繖。四嶺一峰攝。顛風不可渡。徊徨吟苦蘂。精舍少眠夢。披衣步前軒。涼風入初夏。已覺蟲語繁。月展孤塔頂。僧定秋竹根。清寒人世隔。默會何能言。

瘞鵲吟

行漢陽市。以素練四。易白鵲一籠。閉小室中。防夜寒也。反厄於風。可謂健翻南辭。翻棲火樹矣。昔靈蛇有賦。鶴瘞有銘。鵲亦鸞鶴匹。今橫斃於殊鄉。能不悽然心惻乎。既荷錡以掩諸土。因反執而甲之詩。

粵鳥依人亦作客。歷過湖南到湖北。通身玉色雪滿洗。竟體縝紋雲翦刻。啄之啄之青素瓷。神閑貌暇情不羈。幽奇賦憶蕭穎士。提挈句想樊宗師。有白壁雙且購之。何惜鄉絹數匹爲。閉置重簾深幕裏。正恐繁霜中夜委。祇知入室幸無虞。誰識穿墉傷有斐。毳毼殞落心悽然。瘞諸二別山之巔。開籠放鵲竟杳矣。作

文磔鼠何益焉。總由天質標殊異。反以防閑遭齧噬。素魂泣月帶風驚。樹上老鴉安穩睡。

尤

璋字仲玉。號醒鄉。江都諸生。事父母孝。居喪至于嘔血。兄弟四人。仲玉以公產讓于伯叔季。授徒自給。復迎兄嫂養之。歿則力營喪葬。待弟亦然。鄉人稱善。仲玉博學能文章。究心天文樂律河渠步算之學。與修徐州府志。山東通志。及揚州府志。江都縣志。雍正乙卯。詔舉博學鴻詞。趙制軍。高撫軍。先後檄起赴京。徵君以年老辭。趙公高之。乾隆丙辰。詔舉孝廉方正。甘泉令與公鑑。造應禮請。未及春。趙。徵君已歿。所輯兩漢名臣言行錄。唐宋詩。迨四庫釋注數十卷。詩文集若干卷。以貧零落不能刻。其孫諸生仁武。輯其詩七十首。爲仲玉詩鈔一卷。

白紵辭

玉簫緩。柝鼓低。吳兒含笑歌春詞。芙蓉爲面雲爲衣。聲隨舞節媚以遲。啓明星促紅樓月。樹影矍矍啼百舌。堂上清歌猶未闌。起視東方忽不悅。

車遙遙篇

車遙遙兮馬蕭蕭。思勞人兮心忉忉。黃河闊兮風颼颼。妾夢往兮苦波濤。波濤息兮會有時。魂夜來兮君不知。

與藥齋秋夜論詩

犀垂簾。押峭寒遲。尊酒論文夜雨時。味外酸醎稱表聖。詞中珠貝說陳思。按圖求索終無駿。視譜安排豈有基。識得風騷真意在。一心提印復何疑。

史芳淵 字蓮溪。號盤塘。江都人。少貧。勤學立品。王已山主安定講席。極心折之。曰。今之羅近溪也。乾隆元年。舉孝廉方正。郡邑交薦。賜六品頂帶。備詔用。又相縣奉旨。立申明亭于郡學。徵君名列善人第一。徵君

事親孝。居喪盡古禮。分田與兄弟。而已賃居。終日默無戲語。
卒於乾隆戊申。年九十。所學精于宋五子。而詩亦澄遠絕俗。

客中春雨

積雨東郊路。勾留客未行。紅深春漸老。綠暗鳥無聲。支枕難成寐。憑欄獨課晴。歸期渾莫定。只隔水盈盈。

題照

冠劍一何壯。琴書不自違。撫松餘古意。臨水發清機。匹馬立芳草。半山銜落暉。深林幽興洽。知爾澹忘歸。

葉

敬字義方。江都諸生。幼從外祖周寒溪學詩。嗣學于諸翁方思翁扶南。專主杜韓。張紹村文。稱其閱深淵博。
尤善書。所書墨跡及石刻。
郡人奉爲楷法。年七十卒。

題徐大士修所藏邊維祺蘆鴈圖

東吳詩老劉荊圃。筆端詞翰力扼虎。曾題邊君蘆鴈圖。一時兩美真千古。邊有冰雪腸。屈盤七澤藏三湘。蘆鴈之名詩。比例如鄭鷗鵠。崔鴛鴦。東海徐郎雅好奇。貪饕此畫如調飢。春日造我索詩句。蕭騷斗室生秋颼。沙水不容拳。羽毛僅盈指。飛鳴宿食各天然。咫尺江湖三萬里。關塞回頭路已賒。芳洲煙水自成家。菰米沈雲波裏影。荻蘆飄雪風中花。翡翠紅樓憐顏色。筠籠深鎖鉤簾側。何若秋空任杳冥。夢魂終與紅塵隔。酒酣對此興欲狂。扁舟願隨鷗鷺鄉。太息邊君不可作。我思荊圃中心傷。君不聞嚴城霜角吹初歇。歷歷歸鴻叫殘月。

題春航合樂圖

肉聲絲韻付雙鬟。蘋末風微一棹閒。回首十年年少日。短衣鞭馬掠前山。
洞簫聲裏轉船頭。寂寂珠簾半不鉤。野水似鱗花似錦。月明吹上十三樓。

黃山雲海歌爲汪比部起作

黃山山高一千一百七十丈。怪松危石矗叢莽。倚空三十六峯寒。風雨靈神恣來往。燭龍銜日罡風竊。白衣蒼狗交模糊。隱隱幽巒叫木客。紛紛老壑飛天吳。迴觀大地失空明。轟雷足下嬰兒聲。天都徑絕蓮花險。時聽碧落敲仙枰。君家黃山最深處。鶴書催入含香署。動容一詠南陔詩。遙揖山靈賦歸去。硃砂泉水暖且芬。老人峯外花如薰。振衣長嘯煙鬟春。疑有拍肩綠鬢方瞳人。丹書碧躡起居法。雲深語祕尙可聞。
龐大·繩直·從黃子湖寄書附示近詩兼惠佳味賦謝繩直·居北湖黃珏橋·人皆稱曰龐先生·醢酒善吟·後不知所之·或曰自沈于水·

吾愛風流龐士元。湖光千疊到柴門。絨函碧簡驚晨夢。撥刺銀鱗佐晚飧。半尺烏絲分異錦。十年青鬢隔金罇。何常閒夜聯吟去。捕蟹篝燈入水村。

高玉桂字燕山·號竹屋·江都貢生·著秋軒詩草·

議復保障湖舊蹟

湖水舊空曠。直達平山根。我生未及見。猶聞長老言。何爲久湮塞。菰蔣日以繁。畧師及田父。將以長子孫。

所嗟觴詠地，隔絕如垣藩。坐使五塘盛，老舊不復存。安得蘇白儔，攬勝清河原。兩岸栽桃李，一篙抵寺門。

汪士慎

字近人，號巢林。祖居富谿，移居揚州。善分書、工畫梅，詩味清高。迥出塵壒。性嗜茶，著有巢林集七卷，卷端繪有啜茶小像。

渡江

隔江山色煙中見，十里颿開水而浮。自此南遊過吳越，直攜書畫到明州。

正月廿三日嶢谷昆季招遊梅花書院，因雨留飲山館，分得纒字。

未須連屐到城隈，山館層樓一笑開。幽逕吐雲當檻起，東風吹雨過江來。花如輭玉生香淺，詩似明珠出蚌纒。會此春鐙作歡飲，夜深人影亂蒼苔。

吳氏家藏十三銀鑿落歌爲蔚洲賦

東城雅會延陵家，丹黃繞座開秋花。賓朋半是南帆客，簫笛影裏浮流霞。酒酣主人興復作，呼取盤盂重勸酌。明燈閃閃古匣開，著手光流銀鑿落。銀鑿落，十有三，記得先世觴賓客。一觴一詠恣權談，到今歲月留傳久。世世珍藏勝瓊玖，玉壺酒滿瀉紅雲。香沃芙蓉光在手，或爲彝鼎形，或作雲雷象。玲瓏花卉各逞妍，玉璽素礪同雅賞。一飲再飲客顏丹，長歌短歌如狂瀾。玉山欲倒金樽翻，花陰月色移欄干。

黃以琳

字枚書，號怡谷，儀徵人。著自吟編五卷。

次韻吳賓廬先生答問村居詩

葉落一庭滿。秋光愛雨餘。水煙環竹樹。來往熟樵漁。對月難禁酒。除閒好是書。羈塵城市裏。難得此幽居。

汪嘉謨 字寶璋。號歲堂。儀徵人。諸生。

憶秦淮和胡雨瀾韻

白門不到已三秋。清夢常飛水上樓。記得簫聲桃葉渡。棗花簾外月如鉤。

黃 閣 字若宿。號風阿。儀徵人。諸生。

月夜望江南山色

已醉庭中月。還看屋外山。渾忘江水闊。時見嶺雲還。鏡影清逾澈。眉痕淡更彎。只疑滄海上。蓬島有無間。

歐陽齋 字曉亭。號可堂。甘泉諸生。居北湖公道橋。幼聰穎。有聚鳥多栽竹。招山短插籬之句。時人稱之。年二十六卒。詩稿散失。搜得一首。非傑作也。

平山堂

歐公遺跡在文譙。此誰開。鐘響過江去。泉清從蜀來。病僧疎說法。古徑半栽梅。惟有題詩客。扁舟落日迴。

吳倫體 字慎微。號敘齋。甘泉諸生。

哭焦炳文 名煥。甘泉諸生。博學強記。四方以難字問者甚多。

不信斯人竟若斯。花前賭酒記常時。楊留幾兩青山屐。壁挂一囊秋雨詩。湖上小亭梅間柳。胸中餘技卜兼醫。玉樓夜召無人曉。尚有書來問字奇。

朱重慶字自天，江都諸生。少以世家子遊京師。詩才倜儻，傾動一時。中年不第，貧病喪偶，遂多哀苦之音。時日爲東城狂士，著抱經堂詩鈔四卷。

有傷叔祖待園先生叔祖，字岷源，以廩具候選。手著詩文，已刊若干卷。未刊者，瑣瑣而巳。

等身著作仗誰傳，辛苦何堪便化煙。手腕有靈空罵鬼，經函徒飽不逢仙。前塵影事誰堪問，秋雨荒墳劇可憐。莫到來生拋慧業，今生辛苦是青氈。

追傷亡友冒葦原

遠道吟魂不可招，憐君孤負十圍腰。蠻箋猶記愁中擘，濁酒難忘客裏澆。老淚頻年隨夢落，昏燈此夜沒心挑。頭皮手掌摩挲徧，欲助喪車力欠饒。

感舊詩

望江學博老詩翁，書法尤誇一代雄。過罷龍州門定憫，恨更無人似舊春風。張廣文元貞，字仲醇，號長菴，善書。工詩古文詞。籍儀徵，住江都。殷秀才譽慶，字彥來，號讀齋，本松江人，占籍江都。詩才清麗，出

蓮齋狂到十分癡，橐裏金錢揮不辭。便號王門高弟子，那堪米熟未經篩。王漁洋曹棟亭兩公門，性狂簡，落魄死。

麴蘖傷生惜半緣，空教公子態翩翩。好花易落真成恨，才命何當乏兩全。顧文學同根，字友于，爲開河太史長子，詩才賦手。綽有門風，所刊

自謂香沁心骨
吟詩而逝。

焦獲奇人孫豹人千金累致散如塵。將毋賦命真窮薄。只合浮鷗送此身。

揚州府志。孫枝蔚少爲諸生。遭流寇。與其鄉少年。偕戈逐賊。落深

壑。得不死。乃走江都。從賈人遊。累致千金散之。既而閉戶讀書。肆力詩古文。名聞海內。盧雅雨先生。感舊集補傳。枝蔚。字豹人。陝西三原布衣。舉博學宏詞。以年老授中書舍人。同籍。王文簡公居易錄。孫豹人。僑居揚州。高。不見之。孫豹人。予訪之。先以詩云。焦獲奇人孫豹人。新詩雅健出風塵。王安不見陶潛節。端木寧知原憲貧。遂爲莫逆交。池北偶談。孫豹人。老詩人也。以年老授官。放還山。初得正字。賦詩云。一官如籠鵲。萬里本浮鷗。獻賦曾非晏。童。年況異劉。山人今上路。小姑免登樓。臨水看蜩蟬。惟添錯字愁。豹人焦山遇風。作詩云。風起中流浪打船。秦翁失色海雲邊。也知賦命原窮薄。尙欲西歸太華眠。

誰佔消閒好簿書。詩瓢酒醜又茶爐。莫嗟何遜揚州杳。水部而今別姓吳。

盧雅雨先生感舊集補傳。吳綺。字。蘭次。江都拔貢生。知湖州府事。

有林蕙堂亭阜等集。今世說。吳蘭次。宜州守。爲治簡靜。放衙散帙。蕭然洛誦。繩牀柴几。燈火青燐。吏人從屏戶窺之。不辨其爲二千石也。喜與賓客遊。四方名士。過從無虛日。卒以是罷官。吳梅村贈以詩云。宜如殘夢短。客比亂山多。眞實錄也。

東原故址今誰屬。人與梅花一樣空。只有銜泥輕燕子。春來依舊舞東風。

盧雅雨先生感舊集補傳。宗元鼎。字定九。號梅岑。別號小香居士。

江南江都人。有芙蓉齋柳堂等集。今世說。定九處東原草堂。秋日燕去巢空。落泥汚几席。乃命童子探巢。汲水洗之。復徵洗燕泥詩。性酷嗜梅花。堂有古梅一株。時人謂之宗郎梅。

牝牡驪黃誰辨此。當年歌斷淚縱橫。留心經濟曾何補。輸與轟雷瓦釜鳴。

漁洋詩話。門人張琴。淵靜沈默。作歌行歸風發。而不失規矩。揚

州人無知其工詩者。余取其詩入感舊集。揚州府志本傳。琴尤留心經濟。嘗著有淮黃交會。開濟海口諸議。及漕運鹽法。篇。當事多採其言。用有成效。盧雅雨感舊集補傳。琴字桐峯。江南揚州人。康熙癸丑進士。授內閣中書。未仕卒。有涉園耐庵等集。感舊集載其子品。六馬園歌。末云。才展此圖推案起。房公魏公亦幸耳。牝牡驪黃誰辨此。未遇其人則已矣。

查繼華亭乙卯生。吮毫愛候月輪明。後先書畫同無匹。四海賢愚識姓名。

盧雅雨感舊集補傳。查士樸。字二瞻。號梅壑。江南休寧縣學生。僑

居江都。新治荆思舊跡。查二瞻書畫。得董宗伯神髓。宋漫堂不輕許人。獨以得二瞻所繪師子林冊爲快。暮年不意姬侍。曉起最遲。凡應酬臨池揮酒必於深夜。不以爲苦。年八十餘。

張

和。字覆中。江都人。乾隆甲子武舉。乙丑進士。授御前侍衛。歷任狼山向原諸鎮總兵。署理貴州提督。癸亡普訴。恩賜恤典。好吟詠。所過山川。以詩爲記。著有雙香堂詩集二卷。乾隆壬辰刊梓。

送家大人之任

廿載閒居久退休。傷心今又赴梁州。祇緣數口需微祿。可奈高年作遠遊。萬里關河雙白鬢。三春風雨一扁舟。從茲調護尤須慎。路入銅崖瘴海浮。

涼州道中

征途迢遞歷郊圻。村堡蕭疎景物稀。灌夏田惟憑澗水。禦寒人盡著牛衣。風吹草折番羊立。雪壓林低野雀飛。行役那能安啓處。前旌猶自指斜暉。

洮州道中

翠旗紫蓋渡洮河。小隊行邊景物和。酥雨尙憐花信晚。春風已上柳條多。雪消秦嶺千峯出。水漲岷江一鏡磨。正是眼前詩意滿。還聞隴畔起田歌。

秋日懷亡室于夫人

寂寞坐空庭。獨見雙飛鳥。我已觸柔情。彼偏啼不了。況值暮雨天。點滴愁人老。萬慮從中生。愁焉心如掃。回思河湟別。生死真草草。乃知常德言。竟是先幾兆。癸未赴河州任。途次常德。婦忽欲南歸。秋魂不可招。秋雲天際渺。兒女未

知愁猶來雙膝繞。

金門詔。字軼東。號東山。徽州人。籍揚州。乾隆丙辰進士。翰林院庶吉士。改知縣。以忤上官被劾歸。放浪山水間。京師宣武門外。揚州會館。其所修也。

過趙北口

春風雲暖破春妍。楊柳青青早放顛。亦似江南湖水碧。片帆吹過打魚船。

馬曰琯。字秋玉。一字嶠谷。本籍祁門。造蘆按館無虛日。酷愛典籍。有未見書。必重價購之。聖駕南巡。兩賜御書。生討經義考之類。不惜千百金付梓。以故藏書樓所藏書畫碑版。甲于江北。癸巳奉旨搜訪遺書。時徵君已沒。其家藏進藏書。可備採用者。至七百七十六種。降旨褒美。前蒙御題所進編冠子詩一首。賜古今圖書集成一部。又賜平定伊梨金川詩。并得勝圖。徵君詩編綿清婉。格韻並高。昆洲沈宗伯德潛。以爲峭刻得山之峻。明淨得水之澄。著沙河逸老集六卷。瓣谷詞一卷。文集若干卷。徵君兄弟業齋。費產遜于他氏。而卒能名聞九重。交誦天下。則稱古能文之效也。當時擁重賞過于徵君者。奚翅什伯。至今無人能舉其姓氏矣。

秋日遊吳氏園林同用梨紅大谷晚桂白小山秋平字爲韻

癩病同希逸。初涼何所之。林亭聊作主。煙月暫相期。潮水通茅屋。松聲出枳籬。坐來神思靜。酒渴索霜梨。霧濃衣袂溼。鳥語半園空。寒竹玲瓏碧。秋花細碎紅。自然舒倦眼。兼可息微躬。得謝塵埃事。當爲鄰舍翁。願結香燈社。都將俗慮刪。千花常作供。一月不開關。歌板何曾污。浮雲鎮日閑。草堂披蕙帳。風景似嵩山。
園內有因是菴。

雨來喧衆樹。葉脫滿簾秋。倚檻增新望。連牀起昔愁。
前年春曾與先兄同過。芙蓉敬湖底。鴻鴈落沙頭。感觸成惆悵。應

難此久留。

街南書屋十二詠

虛庭宿莽深。開徑手芟翦。會有雲壑人。時來踏蒼蘚。山館。小玲瓏。
我有山中心。不得山中宿。愛此兩三峰。憑闌肆遙矚。看山樓。
綺錢晴日麗。粉纈苔花侵。春去亦等閑。鬢絲吹上簪。紅藥階。
摩圍老人語。借以顏吾軒。彈琴復解帶。此意誰爲傳。透風透月兩明軒。
洞中若有室。片雲入我懷。長松覆陰竇。煙蘿褰陽崖。石屋。
疑遊水藥洞。石激波瀾洄。啓窗無所有。海桐花亂開。清響閣。
垂垂紫瓔珞。可翫復可摘。摘以供清齋。翫之比蒼葛。藤花。
下規百弓地。上蓄千載文。他年親散帙。惆悵豈無人。樓。叢書。
長廊斂夕曛。味甘思益苦。起予者寒蟲。唧唧牆根語。覓句廊。
井上二楊柳。掩映同翠幕。空瓶響石闌。寒泉濺芒屨。井。澆藥。
七峰七丈人。不巾亦不機。偃蹇立箕箒。清冷逼毛髮。七峯草亭。
瘦竹窗櫺青。寒梅屋角白。雛鶴小襦襪。約略見風格。梅寮。

過洞庭

不向洞庭過。焉知秋水多。魚龍蟠水石。橘柚老煙波。從事皮夫子。浮家張志和。高風猶在望。慙愧昔蹉跎。

題汪蛟門先生少壯三好圖

三好蘭陵有晉風。先生用意豈雷同。何時檢得親題句。補入梧桐詩集中。

自昔能文說馬遷。還憑子幼表前賢。

謂江

收藏遺照教人識。儒雅風流盡可傳。

題雅雨先生借書圖

會稽書都遍。長須尙往還。高懷輕宦海。絕學寄名山。此地慚題戶。誰家足掩關。圖成宛轉意。終恐一鳴閑。

陸南圻張漁川雨中留余兄弟讓圃山樓小飲卽席作

直擬山中住。較山應更幽。雨聲連磬落。樹色帶雲流。翳燭頻看鬢。論心不下樓。忘機如我輩。卽此是菟裘。

漢首山宮銅雁足鐙歌

鑿下銘云。竟寧元年。護爲內者造銅雁足鐙。重四觔十二兩。護武爵夫翁。操廣漢。主右丞賞。守金鑿。護工衣史不禁。首山宮內者。第廿五受內者。

漢帝竟寧之元年。呼韓單于稽首前。鄉禮慕義願保塞。從此天子毋防邊。帝因賜爵傳三輔。寢廟寢園還故土。首山銅鑄首山鐙。猶照鼎書翳復吐。齋宮燼火光燭天。破鏡梟鳥隨飛煙。象形鎔范定儒士。蹠足陽烏薦吉燭。億昔效靈來五色。西河世廟矯雙翼。冰弦瑤瑟踵甘泉。元酒陶匏牲薦栗。慶雲清影未移辰。未央宮瓦潛酸辛。蛭脂幾見華槃膩。蠟淚俄驚甲觀新。電抹星移二千載。硃碧沈埋出精彩。祠官姓字細如

絲鳥跡。蠹文留篆楷。老我眇昏眊。若無摩挲古物媿空疎。秋窗試聽賓鴻過。一點釭花認舊夫。

晉樹亭坐雨同邵北崖程汧江陳竹町陸茶塢張西園弟半查分得坐字

入秋已浹旬。殘暑氣未挫。暑盛猶可逃。旱盛真無那。今朝北郭苔。欣逢上客破。老樹垂千年。稗竹搖萬个。颯然好雨來。清風先滿坐。一時研席涼。幾處農人賀。擬作甘澤謠。君譌我當和。

薄暮至石公山

舊遊惟此最。風便一帆過。旛蓋殿前少。枇杷門外多。殘陽下高嶺。明月上澄波。只恐湖山笑。頻年負薜蘿。

五君詠

人事宦途歷。道心林下生。偉哉中丞公。六纛懸雙旌。夢寐隔霄漢。著述歸柴荆。開卦悟龍變。緬想含深情。
胡復翁

矯矯雲中鶴。鍛翮辭長風。往昔唐先生。垢衣蒼蘚中。盃酒神京返。浩歌秋室空。淹留歿淮甸。感物傷予衷。
唐天門

世族等儒素。煙雲供吞吐。環山秉靈秀。不獨繪事古。蕭散嵇阮流。放曠麋鹿伍。一再辭上官。幽踪老衡杜。
方嶺山

蒼稗邱索精。抉搜水石妙。南湖樊榭生。文筆窮窈眇。謀祿養衰親。空赴大科召。不礙賦閑情。時流勿相誚。

鳳樓
樹

醫門每多疾。吾聞諸莊子。清才姚薏田。竟坐藥誤死。下峯何蒼蒼。若水何瀾瀾。千載失斯人。抱恨蘋花裏。
姚薏田

秋日集行菴

袁溪巖桂盛開。主人排日宴遊。而余未得與。篠園主人。邀客爲城南之會。各攜硯具。泛舟於菰蒲蘆葦間。分韻賦詩。而余亦未得與。南莊。在城東霍家橋之南。荒村斷岸。竹樹蒙密。秋香芬馥。雖不逮環溪篠園。亦具體而微。而余又以羈縻未得去。惟行菴出郭數武。中有千餘年老樹。壽藤纏絡。雲日蔽虧。鐘魚梵唄之音。不絕于耳。隔院有鷓鴣三隻。時一睨空。聲聞于天。偶與同人小憩其間。酒半各賦五言律一章。

天宇一何淨。虛庭無俗聲。風鐘穿樹遠。雲鶴唳秋清。良會已再隔。暮江空復情。惟餘謝公宅。時復醉孤鐙。

擬復竹西亭和泝江太史

邗溝東畔竹西亭。歲歲尋遊感廢興。細雨斜廊還有井。蜀井在禪智寺。夕陽秋寺欲無僧。幾時碧玉圍千箇。依舊

紅闌覆兩層。收取江南煙樹色。蒼茫祇借一枝藤。

過彈指閣訪朱稼翁

鴛湖詩老至。秋日寄僧廬。風起書籤亂。雲歸佛閣虛。君應理鉛槧。我喜得依於。促膝涼陰徑。槐花一寸餘。

甲戌初冬同人集蟬書樓重觀行菴九日文讌圖距今星紀一周不勝歲月遷流友朋凋謝之感各系以詩

十二年來一雲過。空庭曾記寫煙蘿。題詩作畫憐清讌。憶舊懷人感逝波。雲樹依然時寂歷。尊罍不改意

蹉跎燈前叫斷西風雁。零落黃花也不多。

馬曰

字佩兮。號半查。秋玉徵君之弟。博學工詩。與兄齊名。稱揚州二馬。乾隆丙辰。通政使趙之垣。薦舉博學鴻詞。不就。家在東關街。嘗卽街南構書屋。爲藏書講集之地。又曰小玲瓏山館。有看山樓諸勝。始馬氏得

太湖石甚佳。建山館置之。而以小玲瓏名。適鄰家不便其立。半查乃語兄止之。及山館歸。汗雪礪。本石始立焉。半查詩。見于邗江雅集、林屋唱酬錄者最多。所著有南齋集。

杭州半山看桃

山光簇簇映明霞。燕子低飛掠酒家。紅影倒溪流不去。始知春水戀桃花。

秋霽集看山樓得山字

秋色矜新霽。憑闌此解顏。雲涼花氣薄。天淨鳥行閒。喜有三間屋。還添一角山。何當諸勝侶。吟望不知還。

街南書屋十二詠

愛此一拳石。置之在庭角。如見天地初。遊心到廬霍。小玲瓏山館。

隱隱江南山。遙隔幾重樹。山雲知我閒。時來入窗戶。看山樓。

孤花開春餘。韶光亦暫勒。寧藉青油幕。徒誇好顏色。紅藥階。

詩情渺何許。有句在空際。寂寂無人聲。林陰正搖曳。覓句廊。

嵌空藏陰崖。不知有三伏。蒼松吟天風。靜聽疑飛瀑。石屋。

好風來無時。明月亦東上。延玩夜將闌。披襟坐閒敞。透風透月兩明軒。

何來紫絲障，侵曉煙濛濛。忘言獨立久，人在吹香中。

薜花

井華清且甘，靈苗待灑沃。連筒及春葩，亦溉不材木。

井·澆藥

瘦梅具高格，況與竹掩映。孤興入寒香，人間總清境。

梅寮

七峯七丈人，離立在竹外。有時入我夢，一一曳仙佩。

七峯草亭·樓·書

卷帙不厭多，所重先皇墳。惜哉飽白蟬，撫弄長欣欣。

樓·書

林間鳥不鳴，何處發清響。攜琴石上彈，悠然動遐想。

清響閣

題姚薏田蓮花莊圖

故人五載別，沈思紛以積。相望一水間，有夢隔喧寂。寄我煙舍圖，卽此慰離析。秋窗眼爲明，碧浪濯花魄。雲來蓮影涼，風過蓮葉白。想見千娉婷，中有微咏客。況茲勝地初，昔賢有陳迹。遐慕渺何許，趣不減琴冊。而我塵市人，欲寫筆生棘。寧足稱詩篇，庶用代箋尺。安得插羽翰，乘風振兩腋。浩蕩白鷗羣，花間一吹笛。

遊建隆寺用沈傅師遊道林嶽麓寺韻

天水遺事不可論，長淮水流駒隙奔。頽垣縈緯紺宇出，令人彷彿思都園。宋太祖時·王溥昔昏細辨建隆字，當年曾降黃屋尊。券賜黑王此移鎮，鷺鳥豈受樊籠樊。慰撫虛頽六宅使，江城落日烽煙昏。我來尋僧訪御榻，空廊惟有寒雲屯。鐘魚粥鼓亦消歇，何者得爲甘露門。事同畫壁了無迹，庫藏遺弩空留痕。侯王

螻蟻一瞥耳。千年老樹蟠枯根。不如揚州醉劉坦。鯨吞日日思開樽。事見南朝新書光化塔前敗葉墮。壽寧寺畔風鴉翻。古今邱貉可勝歎。輕者非輕軒非軒。牽連竝及建炎代。御容曾奉瞻羣元。

鴈足燈歌

炎漢燈檠二十五。想見神壇照風雨。秀華細錯首山銅。未入歐陽一家譜。集古字遺西漢前。丹陽裴守搜荒煙。羣來鴈足燈銘古。榮宮造自黃龍年。何如吾家曩所得。自昔曾無弋人弋。瓜皮綠活土花鮮。蠶尾蠶頭月半蝕。銘文綠紫之半。故云。初疑檠仿蓮勾形。漢東勾蠶銘。亦彎環如月。既認趾同鳧蹠青。老眼觀書夜行燭。年號依稀辨竟寧。竟寧年間屢郊時。火續燈傳接芳苒。麟鬚難以拂霜蛾。零落蛻膏與鳳髓。不將歌舞挂樓頭。曲柄須煩黨伯舟。皎然細注輝齋壁。浙爾涼風島素秋。墮葉紛紛窗戶裏。似有哀鴻拍秋水。炎光銷盡一咨嗟。開閣殘螢竹間起。

學圃八咏

攫擎松自高。布濩槐亦茂。含風有雙清。映石無孤秀。珍簟倘相從。可以坐炎晝。松槐雙蔭之居。林林繞樓樹。綠意實樓虛。軒窗敞四面。中有仙人居。置身雲氣上。俯視夫何如。即林樓。小池展鏡奩。過雨天光入。熨帖縐不成。蘋末風無力。將何以狀之。寸寸割秋色。綠淨池。孤亭瞰通津。側見往來艇。因占五兩風。忽墮一片影。欲尋欸乃聲。已入蒼煙暝。帆影亭。

青桐擢煙柯。白舫泊幽渚。當窗已作花。隔葉未垂乳。微風入低枝。認作菰蒲雨。舫花
中黑深窳窳。外青高嵯峨。雖云邇庭戶。儼若山之阿。誰歟棲息此。冠笏衣薜蘿。碧山樓
絲竹不如肉。擬議惟清歌。清歌能移情。未若嘯旨多。試問臺上人。吾論非偏頗。舒嘯壺
西籬曲復斜。柳浪青一抹。曉送滿襟風。夜通半枕月。回看演漾時。無限春波活。柳籬

賦得未到晚鐘猶是春

九十光陰成小住。春心一點託僧寮。試思樓角鐘初動。可得筵前燭屢燒。短夢鶯花判隔歲。稻心琴酒尙今宵。與君況是頭如雪。漫說朝來折柳條。

題趙善長畫楊鐵崖吹笛圖

鐵笛一聲崖石裂。鐵笛道人冠戴鐵。當年誰寫洞庭秋。水底蒼龍叫寒月。小臨海歌聽未終。大雷小雷縹緲中。道人不作水東逝。令人卻憶絳長弓。絳長弓。鑄鐵笛。空霜盈襟清淚滴。君不見雲間老客婦。天子不臣諸侯不友。七十二峯屢招手。酌爾圖中一杯酒。

哭厲樊榭

大雅今誰續。哀鴻亦叫羣。情深攜庾信。義重哭劉蕡。望遠無來轍。呼天有斷雲。那堪聞笛後。又作死生分。
社友凋喪。及樊榭而五。

冷泉流不盡。游跡憶前經。一舸載春雨。卅年成聚萍。史收遼散佚。詩紀宋英靈。樊榭所輯。有遼史補遺。及宋詩紀事。寂寞叢書畔。高樓剩墜瑩。

握手看徂謝。詞場失總持。秋燈弔影瘦。明月照情癡。樊榭憫惺詩。有秋衾空抱月明歸之句。遂成絕筆。秋燈賦。別時同作。集在無兒守。魂歸戀母慈。絕弦予白首。仍是歲寒期。

人日集山心室問訊篠園梅花用東坡和秦太虛韻

詩翁筆端如振槁。擺落寒氛成絕倒。春回物象困雕鐫。先有梅花被詩惱。一枝未報水邊斜。萬竹行探離外早。雪殘想見入南枝。縱是開遲看亦好。江山夢醒人未覺。弦管聲喧跡尙掃。況當人日約吾儕。勝裏金花耐身老。盤蔬尊酒兆初正。游事今年非草草。關心更此早訊公。莫待花繁方向昊。

東綠淨老人

平生搖筆學爲詩。不道閨幃是我師。老格都從經史出。清風尤與雪霜宜。九騷堪擬非同調。三節曾傳勝昔時。好把瑤編列彤管。令人直欲廢然脂。三水文氏作九騷以見志。桐城方氏三節各有集。新城王孝功編有然脂集。

馬振仲

字御張。一字經畚。牛黃第三子。爲伯父橘堂後。好讀書。從容和雅。沈默寡言。年二十五卒。著有經畚堂小稿一卷。詞一卷。

秋林

霜黃一夜變。搖落感如何。斷續窺山影。分明數鳥窠。停車留客晚。掃葉得雲多。時有樵聲至。殘陽答嘯歌。

冬日過鐵佛寺

清冬隨步履。古寺一扶藤。踏葉尋苔徑。吟詩對佛燈。泠泠千个竹。落落兩三僧。鎮日皆清磬。誰聞最上乘。

董浦先生以玉輪見貽詩以謝之

斲玉爲輪宋製精。丈人相贈有深情。周行久已承明示。薄質終須待曲成。願我駑駘慚伏櫪。感公推挽策兼程。佩來爭忍輕拋擲。弱冠應知急令名。

南村四詠

城市厭喧雜。卜居郊野間。課農計亦得。讀書意更閑。有時行隴畝。常隨野老還。青雀畝。桂坪。花深不見人。人在花林裏。風過飄微香。籬疎見清泚。客來同坐隱。頓使塵襟已。桂坪。樹色遠迷濛。江潮亦浩渺。沙際何所見。惟有白鷗鳥。白鷗如我閑。永謝塵緣擾。鷗灘。虛樓臨江開。獨居苦離索。遠客遲欲來。俄聞噪乾鵲。佇立望長空。雲帆天外落。即帆樓。

趙秉憲

字景申。興化人。著有竹坡詩鈔一卷。

夏日飲定波菴小樓風雨驟至

暫此登臨破客愁。江雲潑墨夏如秋。座中誰唱驚人句。風雨縱橫亂入樓。

范

韓字平水。如皋人。

過巢民別業賦得尋秋

三徑愁風雨。園林感素秋。平沙蹲怪石。老樹倚危樓。裙屐延新賞。碑題認舊遊。頻澆千日酒。泥醉臥山邱。

余

字又寶。如皋人。

感懷

久有住山意。此心誰與論。低開竹裏屋。獨坐水邊村。歲儉人情異。時平國法尊。莫求分外事。古道願常敦。

徐宗健

字仲花。號翁。洲。江都人。

送淨塵上人歸東山

一瓶一鉢了生涯。何處山林不是家。茶熟鶴邀仙客駕。經餘龍臥石堂沙。飛來天竺峰頭錫。雨徧維摩座。上花支遁更歸何處所。東山一角暮雲遮。

徐獻科

字十夫。興化人。

高士吟

夷不與跖同袍。鳳不與梟同巢。鳳之室兮丹穴。夷之祿兮薇蕨。

戴

字彙來。儀徵人。老子詩。不事雕飾。能得物情。自訂其詩爲酒中源人集。乾隆庚寅年。彙來沒。其友施竹泉撰。續刻其詩爲二集。

壬子九月寓興教寺與汪章彩感秋話雨

一寺同秋雨。誰人追客愁。佛燈昏照壁。蟲語冷侵樓。舊事連牀說。年光逝水流。明朝易分手。惆悵古揚州。共薄紛紛客。來參一味禪。都因愁有力。卻怪酒無權。僧磬靜於夜。鴈聲寒到天。君才難變屈。好著祖生鞭。

練湖

練湖淺水泊漁舟。欲買漁舟湖上遊。只恐衰翁貪放餌。腥風吹我又生愁。

贈山民

飽飯且敲腹。無愁不讀騷。勤惟力稼穡。懶竝廢漁樵。入夢花兼鳥。謀生觚就瓢。千竿銷暑竹。幾葉學書蕉。雖矮讓鄰月。溝深通夜潮。香杭經手鑿。濁酒把胸澆。見吏避官道。攜童過野橋。團圞兒女外。客徑草蕭蕭。

再過河口

夕陽河口鷺拳沙。村竈孤煙冷暮鴉。茅店酒香頻換主。野梅樹老半無花。山餘古寺僧難住。水破新坪路又斜。下蜀街頭添小市。遲予早起喚歸槎。

蕭

說字釋之江都人

文選樓

千載樓頭翰墨香。風流帝子說蕭梁。五臣才藻餘芳草。六代英靈聚夕陽。詩筆雀臺追魏植。名山雞籠跨齊良。簡文事業飄零盡。豈若維摩著作長。

鄭從諫 字聖臣·號四亭·俄徵人·

旅夜聞琵琶

誰將馬上曲。來向客中彈。出塞音偏苦。還家夢已殘。曉風催漏短。秋雨逼燈寒。一夜潺潺淚。青衫溼未乾。

吳琦 字槐公·江都人·

村居

繞屋江村蔭綠楊。一春芳草散牛羊。山窺窗隙雲留影。人醉花前露滴香。醫俗有方移好竹。遊心無事爇都梁。閒中結習詩成癖。依舊微吟送夕陽。

姚景詹 字心繩·江都人·

邗溝

寒雲漠漠古邗溝。愁聽烏啼月滿頭。官閣梅花渾是夢。隋堤楊柳易驚秋。欲辭繡戶三春燕。小泊紅橋一葉舟。鮑照重來應有賦。傷心非復舊揚州。

劉應麟 字兆聖·江都人·

春夜友人招集

入歲春猶淺。官梅凍未開。衝風欹帽出。踏雪看燈來。辛試春盤韭。香浮午夜醅。碧雲天洗盡。放月上瑤臺。

朱光岳

字魯齋。號藥圃。泰州人。

竹西春日偕陸拙菴聽李壺公彈琴

隴西高士邗江客。幅巾杖履神奕奕。閒來步履叩雙扉。顧我時時露胸膈。竹西花柳媚春風。先生一榻忘朝夕。故園有夢未能歸。老淚霑衣話疇昔。劇談一夕清風生。樓拂芒屨歆斗笠。靜掩茅齋一事無。焚香淪茗清無敵。話久爲吾撫素琴。一彈再鼓鬼神泣。流水冷冷指下生。清入毫芒達呼吸。恍如細雨咽秋江。忽漫洶濤撼四壁。同里陸生亦能此。側坐微聞聲太息。嗟乎四條絃子邊關曲。唱徹旗亭煙月白。古調今人杳不彈。傾心入耳倍蕭瑟。落花無數小窗前。春雨聲中更寂寂。歸棹來朝攜陸生。孤篷悵望江天碧。

王

字我旋。江都人。

春暮

斜風細雨晚蕭蕭。三月春光剩此宵。寒氣勒花香不放。老顏得酒興偏饒。苔青幾日侵門巷。髮白何心傍市朝。洗盡游塵歸故里。拖條竹杖伴漁樵。

題秋海棠

碧天露重莎雞老。落葉滿庭堆不掃。秋雨纔晴秋月明。塔下海棠開正好。金釵紅鈴朵朵鮮。閒情幽致實堪憐。低藏螢火埋荒徑。羞逐東風上舞筵。佳名樹占披香北。妃子還春鬪顏色。傾國繁華蝶夢同。何如小

隱蛩吟側。嗟予五載滯天涯。桂子飄香每憶家。回首畫樓人萬里。相思空對斷腸花。

雨宿唐家寺

溼雲連日重。游子欲消魂。野水衝官路。長松遶寺門。燎衣先就火。沽酒遠投村。寢食隨童僕。鄉心未敢論。

宿木盧寺

古寺圍黃葉。行人臥白雲。殿空禽自集。山迴鹿成羣。袁茗同僧話。攜柑與客分。吁嗟雙倦翮。日日望榆枌。

